

# PAULO LIWAKATETIGI ROMAANOTEDI

Paulo didikotibige nigica lapo anonakato Goniotagodi ane ligeladi nigotaga Roma. Roma jaganiaagani nagaca nigotaga ane dagaxa me gonegetigi Itália nigicoa nokododi. Iodagawadi romaanotedi odinigaanyetece moiwa moiwitidegetiogi ijoatawece eletidi iigotedi. Joanigidaa leegodi Roma me dagaxa me gonege, agaca liciagi nigotaga nigicoa nokododi. Jigidiaa ligeladi César, ninionigi-eliodi romaanotedi, goneleegiwa ane dagaxa me gonegegi inatawece iigo nigicoa nokododi. César diigenataka midokoyatigi “Goniotagodi César”. Joanigidaa meliodi me dakaketema loiigi Cristo, leegodi me jakataga mida anejinagatege loiigi Cristo, leeditibige mejiwagata codaa mejinagatalo me Goniotagodi Jesus, ane iige inoatawece aninoa. Joanigidaa leegodi meliodi anoiatetibece nigijo loiigi Cristo.

Paulo iditeloco nagadi liwakate minatawece oko inoa libeyacegeco, codaa mee me digica oko ane digica meo anigetigida libeyacegegi. Joanigidaa leegodi minatawece oko nigo. Codaa mee me digica oko ane igenaga lodoe Aneotedogoji leegodi meote loenataka ane igenaga. Pida Paulo yalagata nigina oko anonakato Goniotagodi Jesus mepaga icota me newigatace anigida noko, codaa yalagata Aneotedogoji me dagadiaa iloikatidi nigina oko leegodi libeyacegeco. Eledi yalagata Liwigo Aneotedogoji me digeladetigi nigina oko anonakato Jesus, codaa me yaxawa nigina oko. Nigidiaagidi Paulo ja yalagata Aneotedogoji micota magaga yajigotediogi lewiga judeutedi, codaa eledi yalagata nigina oko anonakato Goniotagodi me leeditibige moyiwagadi ane liigenatakanegeco nigina oko anida nagatetigi digoina iigo.

## Paulo yecoeditibige romaanotedi baanogoyiwagadi Goniotagodi

**1** <sup>1</sup>Ee Paulo. Ee liotagi Jesus Cristo. Aneotedogoji eniditediwa me ee liigexegi, idiomagaditedice me jelogoditedibece nibodicetedi anele ane icogotedigi miniwataga. <sup>2</sup>Jotigide naga ligegi Aneotedogoji me niwakatee nibodicetedi anele, anoditece nigijo anoyelogoditedibece lowooko Aneotedogoji, analee diniditedini maditaga lotaganagaxi Aneotedogoji. <sup>3</sup>Nigidiwa nibodicetedi anele oditece Aneotedogoji Lionigi, Goniotagodi Jesus Cristo. Odaa mijoa me goneleegiwa, ida aneetetege licogegi Davi. <sup>4</sup>Aneotedogoji yenikamaga me ikee me Lionigi Jesus nigijo naga ibake nimawenegegi nelegi me yewikatiditace nigijo moyeloadi. Liwigo Aneotedogoji ikee Jesus me digica libeyacagajegi liciagi Aneotedogoji me digica libeyacagajegi. <sup>5</sup>Odaa leegodi

Jesus, Aneotedogoji me najigotedogowa inoatawece ane godagalanaga ane daga domigica gonimawenegegi me jakataga, codaa eote moko liigexedi. Eotedibige me jaxawanaga inatawece oko moyiwagadi, monakato, codaa modogeteta Liboonagadi Jesus. <sup>6</sup>Odaa akaami eleditetiwaji awanitege nigidi noiigi, Aneotedogoji eniditedagawatiwaji makaami nepilidi Jesus Cristo.

<sup>7</sup>Odaa jidi nagadi notaganagaxi jiwakateetibigagaji akaamitawecetiwaji ane gadigeladi nigotaga Roma, ane gademaani Aneotedogoji, codaa eniditedagawatiwaji makaami loiigi. Jemaa Aneotedogoji Godiodi, codaa me Goniotagodi Jesus Cristo midioka limedi meletagadomi, codaa mowo mele gadaalegenali.

### **Paulo yotaganege Aneotedogoji codaa diniotagodetalo**

<sup>8</sup>Odoejegi nimedi iniotagodetalo Aneotedogoji Inoenogodi leegodi akaamitawecetiwaji, leegodi nigijo Jesus Cristo aneotedagadomitiwaji. Igaataga inatawece nigina oko digoina iigo odibodiceta gatiwagatakanegegitiwaji.

<sup>9</sup>Jibatema Aneotedogoji manitawece yaalegena nigina me jelogoditedibece nibodicetedi anele anoditece Lionigi. Odaa Aneotedogoji yowoogodi mejitece anewi nigina meji midioka limedi me idalagatibigagaji nigina me jotaganege. <sup>10</sup>Jipokotalo Aneotedogoji me jakadi me idalitagawatiwaji nigina natigide, pida nige yemaa. <sup>11</sup>Igaataga eliodi me jemaa me gadatitiwaji amaleegaga idinaxawanagatiwage jibakenaga godixaketedi ane najigotogowa Liwigo Aneotedogoji, me yoniciwagadi gatiwagatakanegegi. <sup>12</sup>Nige idinaxawanaga, odaa Aneotedogoji gadaxawanitetiwaji, codaa me ee, leegodi eyiwagatakanegegi, codaa me gatiwagatakanegegitiwaji.

<sup>13</sup>Inioxoadipi, jemaa mowoogoti melioditibece me yowoogo mejigo idalitagawa, pida idioka limedi mida ane idibeyacagadi, odaa agabotibece mejigo. Pida jemaa me idalitagawatiwaji amaleegaga jakadi me jaxawa oko anidi makaamitaga modiocece Jesus, digo anejigotiogi ane daga judeutedi ane ligeladi eletidi nigotadi.

<sup>14</sup>Igaataga jigidaa ibakedi ane najigotediwa Aneotedogoji me jelogoditedibece nibodicetedi anele ane icogotedigi miniwataga, jelogoditiogi greegotedi, inaa ane daga greegotedi, oko notaganagaximaga aninoa lixaketedi, codaa me nigina ane digica lixakedi. <sup>15</sup>Joanigidaa leegodi me jibake minitawece yoniciwaga, codaa ja idigo me jelogoditedibece nibodicetedi anele ane icogotedigi miniwataga Aneotedogoji digoida makaamitagatiwaji ane gadigeladi nigotaga Roma.

### **Loniciwaga nibodicetedi anele ane icogotedigi miniwataga Aneotedogoji**

<sup>16</sup>Aidiboligatece nibodicetedi anele anoditece Cristo ane icogotedigi miniwataga Aneotedogoji, igaataga niginoa nibodicetedi anele loniciwaga Aneotedogoji meote lewiga inatawece oko anoyiwagadi Jesus, odoejedipi judeutedi moyelogoditiogi, nigidiaagidi nigina ane daga judeutedi. <sup>17</sup>Igaataga niginoa nibodicetedi anele oiikee Aneotedogoji meote nigina oko me igenagatibigiwaji nigina meniwaagatakanaga, codaa

nigina me dogoika meniwaḡatakanaga. Joanigidaageeta Aneotedogoji lotaga, “Nigina oko ane yakadi Aneotedogoji me igenagatibigiwaji leegodi meniwaḡatakanaga, joanigidiaagida lewiga ane digica liniogo.”

### Aneotedogoji laaḡetedipi inatawece oko

<sup>18</sup>Aneotedogoji ane ideite ditibigimedi ikee lélaḡa leegodi inoatawece ane libeyacegeco oko, leegodi me dogoyiwagaditeda Aneotedogoji, codaa leegodi inoatawece ane beyagi anowote modakapeteḡe eledi oko. Leegodi niginoa libeyacegeco anowote, odaa agoika eledi oko moyowoogodi nigica anewi anodaageeteda Aneotedogoji. <sup>19</sup>Nigina oko oyakadi moyowoogodi anodaageeteda Aneotedogoji, leegodi adinagaditini nigica anodaageeteda, codaa leegodi iniaaginiwa Aneotedogoji ikeetediogi anodaageeteda. <sup>20</sup>Nigijo maleekoka yoeteda Aneotedogoji nigina iigo, nigina ane daga jakataga me jinataga, anodaageeteda Aneotedogoji, codaa nimawenegegi ane daga dinelio, inoatawece dinikee. Odaa nigina oko oyakadi moyowoogodi anodaageeteda Aneotedogoji leegodi niginoa loenataka. Joanigidaa leegodi nigina oko agoyakadi dogodi me digica libatiigi. <sup>21</sup>Iḡataga idaagida moyowoogodi Aneotedogoji, pida agodoḡetetallo, oteḡexaagaga odiniotagodetallo. Pida niginoa lowooko yetoledi, inoa laalegenali agica gaantokaagida lixakedi, odaa agaleegica lowoogo anele. <sup>22</sup>Modi me niwaxinaganaga, pida yetoledi. <sup>23</sup>Agalee odoḡetetallo Aneotedogoji aneliodi nimawenegegi, codaa ane daga daateda. Odaa jogodilatitelogo niwicidi latopiwadi oko anepaga icota me ma, liwicidi ilaagaxodi, eijedi, codaa me niginoa anodigotinigi iigo.

<sup>24</sup>Joanigidaa leegodi Aneotedogoji me ika modioteci nigica anepaa yemaa laalegena mowo ane beyagi, codaa Aneotedogoji ika mowo nigica anepaagoyemaa modigota lolaadi ane goboliga. <sup>25</sup>Agodibateḡe nigica anewi anodaageeteda Aneotedogoji, pida odibateḡe niwitakeco. Odoḡeteta codaa modibatema niginoa liidagatajedi Aneotedogoji, pida baadogodoḡetetallo Aneotedogoji, oteḡexaagaga odibatema. Pida leeditibige midioka limedi me joḡeegatalo Aneotedogoji. Odaa jigidaagee. (Amém).

<sup>26</sup>Joanigidaa leegodi Aneotedogoji me ikatetece mowote anepaa yemaa laalegena. Nigina iwaalepodi jeḡepaagopitiwage dinoomatewamigi, ane daga lakatigi iwaalo. <sup>27</sup>Goneleegiwadi idaagee, agalee loomatewa iwaalo, odaa jeḡepaagopitiwage, owo ane goboliga. Joanigidaa leegodi me iloikatidi Aneotedogoji loolatedi nigina oko leegodi epaagowotibige.

<sup>28</sup>Nigidi oko agoyemaa moyowoogodi anewi anodaageeteda Aneotedogoji, joanigidaa leegodi Aneotedogoji me ikatetece mowote nigicoa anepaa lowooko aninokinoa ane beyagi, odaa jogowote loenataka ane goboliga. <sup>29-31</sup>Nigidi oko nolee inoatawece ane latopaco nibeyacegeco; noomatewadi nigina ane daga lodawadi, codaa inoatawece nimawenegeco mowo ane beyagi, idioka limedi madodigomadadi, codaa idioka limedi mowo ane beyagitema eledi oko. Nigidi oko dagaxa moceḡagaga, codaa gonematagododi, idioka limedi me nidelaḡa, awitakaga,

inoka oyowo mowo ane beyagitema eledi oko. Nigidi oko odotagatibige eledi, enalaganaga oiatiwage eledi oko. Nelegedi Aneotedogoji, agodeemitetibige eledi oko moyotaganega. Anabakenagaga, odiletibige me daaditigica liciagi, lemaanigi monagaxateloce eledi oko. Idioka limedi modoletibige geladi nimawenegeco mowo ane beyagi. Nigidi oko agoyiwagadi eliododipi. Agaleegica dogoyowo nigica ane igenaga. Ajakataga daga jinakatonaga ane lotaga nigina oko liciagi. Otegeaxagaga oyemaa litacepodi. Agoixomagateetedijo eledi oko libeyacegeco, codaa agoiwikode eledi oko. <sup>32</sup>Oyowoogodi Aneotedogoji liigenatakanegegi mee me leeditibige moyeloadi nigina oko aneo niginoa ane beyagi. Pida idokee mowote niginoa ane beyagi, codaa oyaxawa eledi oko mowo ane beyagi.

### Aneotedogoji icota me iwi anodaagigotediogi oko

**2** <sup>1</sup>Natigide, akaami godokaagedi, ane eni eledi oko mepaga abeyacegegi. Nigida makaamitiwaji agakati makamaga anapitagati gadoenataka, aicogota ganigakaami. Igaataga nigina me gadigoatita eledi oko, pida awii liciagi niginoa anowote, jigikeeni Aneotedogoji magaga gadiloikatiti leegodi gabeyacegeco. <sup>2</sup>Jowoogotaga Aneotedogoji meote ane igenaga nigina me iwi anigotediogi codaa nigina me iloikatidi oko anowote niginoa ane beyagi. <sup>3</sup>Nigida makaami ane gademaanigi me gadigoatita eledi oko anowo, pida akaami eledi awii ane beyagi. Odaa agica ganimawenegegi daga gadiwokoni me gadiloikatiti Aneotedogoji. <sup>4</sup>Akati ina me digica ane jaoga Aneotedogoji me dagaxa meletedogodomi, odaa anaga godiloikatidi leegodi meliodi me yakadi me dinatitedogowa. Ejinogowoogoti Aneotedogoji meletedagadomi, eotedibige madinilaanitece gabeyacegeco, odaa opilitalo Aneotedogoji.

<sup>5</sup>Pida dakake gadaalegena, odaa agemaani daga iigi aneni me gadewiki. Joanigidaa leegodi Aneotedogoji menegegi yelatedagadomi nigicota nigica noko nige ikee lélaga leegodi nibeyacegeco, codaa eote ane igenaga nige gadiloikatiti leegodi gabeyacegeco. <sup>6</sup>Igaataga Aneotedogoji yajigote oninitedibeci oko ane igenaga me lojedi ane loenataka. <sup>7</sup>Nigina oko anidioka limedi mowo anele, codaa anodoletibige Aneotedogoji me iwenigide, codaa anoyocaganega Aneotedogoji, codaa anodoletibige lewiga miniwataga, odaa Aneotedogoji yajigote lewiga nigini oko ane dagadiaagica liniogo. <sup>8</sup>Pida nigina eledi oko ane adodigomadadi, codaa ane dogoyiwagadi anewi, pida inoka odioteci ane beyagi, Aneotedogoji yelatetema codaa me iloikatidi nigina oko liciagi. <sup>9</sup>Aneotedogoji eote lawikodico codaa me ligecagalogo inatawece nigina oko anowo ane beyagi. Odojeggi me nikatedeloco lawikodico judeutedi, nigidiaagidi nigina ane daga judeutedi. <sup>10</sup>Pida nigina oko anowo anele, Aneotedogoji nelecagatee, codaa iwenigide miniwataga, codaa meote mele laalegena. Odojedipi judeutedi, nigidiaagidi nigina ane daga judeutedi. <sup>11</sup>Igaataga Aneotedogoji agica liomagatagi noiigi, pida idokigotedogowa digawiniteloco oko.

<sup>12</sup>Inatawece nigina oko ane dogoyowoogoditeda liigenatakanegeco Aneotedogoji, codaa aninoa libeyacegeco, joanigidaa naaga. (Pida aleegodi

me dogoyotetteda liigenatakanegeco). Inatawece noiigi judeutedi idiwa liigenatakanegeco Aneotedogoji miditaga, pida Aneotedogoji iloikatidi leegodi agoyiwagadi liigenatakanegeco. <sup>13</sup>Igaataga Aneotedogoji aigenagadi oko daga leegodi me wajipatalo liigenatakanegeco, pida leeditibige nigina oko meyiwigadi liigenatakanegeco, odaa Aneotedogoji igenagadi nigina oko. <sup>14</sup>Aneotedogoji ayajigotediogi liigenatakanegeco nigina ane daga judeutedi. Pida nigina oko nige diniomagaditema ane yemaa Aneotedogoji, idaagida me dogoyowoogodi nigica ane iigete, odaa bogoikee moyowoogodi nigica ane igenaga catiwedi laalegena. <sup>15</sup>Nigida anee me newiga ikee moyowoogodi catiwedi laalegena liigenatakanegeco Aneotedogoji. Idiaagidi odeemitetece ane igenaga catiwedi laalegenali, odaa oikee mewi midiwa liigenatakanegeco Aneotedogoji catiwedi laalegena. Idatibece nigica anodeemitetece catiwedi laalegena eetibigeloco, codaa idatibece magaga oikee mele anigida loenatagi. <sup>16</sup>Jigidaagee nigicota nigica noko Aneotedogoji nige niige Jesus Cristo me iwi anigotediogi nigina oko leegodi lowooko ane dinagaditedini, codaa me niginoa loenataka ane dinagaditedini. Joaniginaagoditece niginoa nibodicetedi anele ane icogotedigi miniwataga Aneotedogoji, ane jelogoditedibece.

### **Judeutedi idiaa liigenatakanegeco Aneotedogoji**

<sup>17</sup>Nigida makaami adinabakenitibecetiwaji makaami judeutedi. Anakatoni liigaxinaganegeco Moisés, codaa eni makaami nepilidi Aneotedogoji. <sup>18</sup>Jogowoogoti ane yemaa Aneotedogoji, codaa Aneotedogoji lotaganagaxi ane diniditologo liigenatakanegeco etigadiigaxinitece moleetibige inokina ane igenaga. <sup>19</sup>Agica dagawienatakanitiwaji makati makaami ligiilagadi goladi, codaa aleetibige dagakaami nilokokena nigina ane idei nexocaga. <sup>20</sup>Nigida makaamitiwaji aleetibige dagakaami niigaxinogododi nigina ane digicata lixakedi, codaa nigina anokatecigida lixakedi ademiitiogi micataga daga nigaanigipawaanigi. Aneotedogoji lotaga ane diniditologo liigenatakanegeco idiwa makaamitagatiwaji anoikeetagawa inoatawece godixaketedi, codaa anewi. <sup>21</sup>Enice akaamitiwaji ane iigaxini eledi oko, igaamee ina mecogotace akamagakaami adiniigaxini? Elogotitibece degeleta me jolicaga, pida akamagakaami olicetiwaji. <sup>22</sup>Codaa menitiwaji me daga yakadi me jogolagatakanaga, pida akamagakaami agolagatakanitiwaji. Codaa gadelegetedi niwicidi noenataka, pida olicetalo niginoa laxedi ligelatedi niwicidi. <sup>23</sup>Adinabakenitibecetiwaji leegodi adinanenitece midiwa Aneotedogoji liigenatakanegeco makaamitaga. Pida awii eledi oko me dagadiaa odeemitetigi Aneotedogoji leegodi akamagakaamitiwaji ate iwagati liigenatakanegeco Aneotedogoji. <sup>24</sup>Joanigidaageeta Aneotedogoji lotaga, “Nigina ane daga judeutedi beyagi modotagatibige Aneotedogoji leegodi gadakataga, anakaami judeutedi.”

<sup>25</sup>Nigina makagiti gadolaadi mikeenitiwaji makaami nepilidi Aneotedogoji, nigida ida anawiite nigina nigoteteni liigenatakanegeco Aneotedogoji. Pida nigina nige dogotetenitedatiwaji liigenatakanegeco Aneotedogoji, icaagica

akagiti gadolaadi, agica mawii, codaa gadiciagi nigina ane daga judeutedi (ane daga nepiliditeda Aneotedogoji). <sup>26</sup>Nigina ane daga judeutedi nigoyotete liigenatakanegeco Aneotedogoji, Aneotedogoji idigote micataga dogoyakagidi lolaadi, codaa nepilidi. <sup>27</sup>Joanigidaa nigina ane daga judeutedi, nigoyotete liigenatakanegeco Aneotedogoji, oiikee Aneotedogoji me gadiloikatititewaji anakaami judeutedi, anepaga domigidiwa makaamitaga notaganagaxiidi ane diniditelogo liigenatakanegeco Aneotedogoji, oada domaga gaditewegegi makagiti gadolaadi, pida agoteteni liigenatakanegeco Aneotedogoji.

<sup>28</sup>Igaataga nigina oko nige judeu, pida anebi Aneotedogoji daga leegodi eliododipi me judeutedi. Codaa nigina goneleegiwa nigidokida me yakagidi lolaadi, agica aneletema miniwataga Aneotedogoji. <sup>29</sup>Pida begewi me judeu, codaa mewi me nebi Aneotedogoji, nigina oko ane judeu catiwedi laalegena. Aneotedogoji Liwigo ikeeta catiwedi laalegena mewi me nebi Aneotedogoji. Notaganagaxi ane diniditeloce liigenatakanegeco Aneotedogoji agica nimawenegegi degego oko me nebi Aneotedogoji. Aneotedogoji iwenigide nigina oko anewi me judeu, idigida agoneleegiwa iwenigide.

### Jakataga me jinakatonaga Aneotedogoji

**3** <sup>1</sup>Domige dagaxa mele moko judeu, ogoa domige ina me dogoko judeu? Domige ica jaogo ina judeu me yakagidi lolaadi me ikee me nebi Aneotedogoji? <sup>2</sup>Nigina moko judeu eliodi mele. Odoejege leegodi Aneotedogoji najigotedogowa lotaga me jelogotagatedibece. <sup>3</sup>Pida eliodi judeutedi agoyiwagadi lotaga Aneotedogoji. Odaa manigidaa leegodi Aneotedogoji me degeote ijo ane ligegi meote? <sup>4</sup>Ayakadi daantigidaa leegodi! Leegodi Aneotedogoji ewi, agica daga diwitaka. Pida inoatawece goneleegiwadi бага awitakagaga. Joanigidaageeta lotaga Aneotedogoji, mee,

“Iniotagodi,

leeditibige me dinikee makaami ane igenaga nigina motagani, codaa icota magekeni nigina anodotagatibigagaji.”

<sup>5</sup>Gobeyacegegi nige ikee Aneotedogoji me igenaga, mige jakataga mejinaga Aneotedogoji me daga igenagateda nigina me godiloikatidi leegodi niginoa gobeyacegegi? Nigina me jao nigida igikanegegi, inowiiigotigi nigina oko anida aneetege nigina iigo me notaganaga. <sup>6</sup>Pida ajakadi midegejatigi igegi. Igaataga daaditaga igenagateda Aneotedogoji, oada agotaga yakadi me iloikatidi oko leegodi libeyacegeco.

<sup>7</sup>Inatecibece oko modi, “Iwitakegi nige ikee Aneotedogoji mewi niginoa lotaga, codaa nige ilecatiditibigimece Liboonagadi, enice igaamee ina me idiloikatidi leegodi inoa ibeyacegeco?” <sup>8</sup>Inatibece modi, “Jaoga ane beyagi ijoatokaaga jiwidaaga anigida anele nigina me jaoga ane beyagi.” Eliodi oko modi me nigidaa godiigaxinaganegegi, oada beyagi modotagatibigogoji. Pida Aneotedogoji eote ane igenaga nige iloikatidi nigidi oko anodotagatibigogoji.

### Agicoa iniwa ane igenaga

<sup>9</sup>Enice igamodaagee? Ina anoko judeutedi domigica aneletogodomi agoda godiciagi ina ane daga judeutedi? Ee meji agica aneletogodomi! Igaataga ja jikeenaga nibeyacaga mida loniciwagateloco inatawece oko, judeu, codaa ane daga judeu. <sup>10</sup>Nigida diniditologo Aneotedogoji lotaga, modi,  
“Agicoa iniwa ane igenaga.

Odaa agica!

<sup>11</sup>Agica ane yowoogodi nigica ane igenaga, otegexaagaga odoletibige Aneotedogoji.

<sup>12</sup>Inatawece oko eyamagaticoace, odaa agaleegica jaoga.

Codaa agicoa iniwa aneote anele.

Agicoa!

<sup>13</sup>Niginoa niolatedi liciagi émegegi libegi ane domoke (leegodi niginoa lotaga).

Idioka limedi moninaaletiniwace oko oibake niginoa lotaga.

Micataga digini lakeedi niweneeno niolatedi.

<sup>14</sup>Niginoa lotaga nixoomaganaga codaa niginoa lotaga gonitiadi.

<sup>15</sup>Yediigatibigiwaji moyacilotidi codaa moyeloadi oko.

<sup>16</sup>Nigina ane diitiwe oyaagadi inoatawece, codaa mowoeledi oko magecagalo.

<sup>17</sup>Agoyowoogodi nigica anodaagee me jakataga mele godaalegena.

<sup>18</sup>Codaa agodeemitetibige Aneotedogoji.”

<sup>19</sup>Jowoogotaga inoatawece lotaga Aneotedogoji ane iditedini Moisés mida ane ligegitiogi inatawece oko anidiwa miditaga me digicata ane yakadi me napitagadi loenataka, codaa me digica ane yakadi mee me digica libeyacegegi nige limedi Aneotedogoji me iwi anodaagigotediogi oko. <sup>20</sup>Enice agica ane yakadi mee me igenaga lodoe Aneotedogoji daga leegodi me yotete liigenatakanegeco Aneotedogoji. Igaataga liigenatakanegeco Aneotedogoji onikeetogowa minoa gobeyacegeco.

### Anodaageeta Aneotedogoji meote lewigá oko

<sup>21</sup>Natigide Aneotedogoji ja ikee anodaageeta meote nigina oko me igenagatibigiwaji. Aleegodi moyotete inoatawece liigenatakanegeco, pida leegodieledi ane niiticogi meote me igenagatibigiwaji. Moiséseledi ikee nigida gela gonimawenegegi me godegenaga, baanigijo moikee nigijoeledi anoyelogoditedibece Aneotedogoji lowooko nigijo nogoidi Aneotedogoji lotaganagaxi. <sup>22</sup>Nigica gela gonimawenegegi me godegenaga baga nigina oko monakato Jesus Cristo, odaa ja igenagatibigiwaji. Codaa Aneotedogoji agica idi

lemaanigipi. <sup>23</sup>Igaataga inatawece oko inoa libeyacegeco, codaa agicoa iniwa ane igenaga daga liciagi Aneotedogoji, ane dagaxa me igenaga, yapidi, codaa agica libatiigi. <sup>24</sup>Aneotedogoji eote oko me igenaga leegodi godiwikode, codaa idioka limedi meletedogodomi, odaa ja najigotedogowa nigida ane daga domigica gonimawenegegi me inigaanyagatece. Jesus Cristo ja yedia loojedi oko me yakadi me igenaga nigijo naga yeleo leegodi gobeyacegeco. <sup>25</sup>Aneotedogoji niige Jesus Cristo me nadoogodi lawodi me yeletetema libeyacegeco oko. Jesus yeleo eotedibige me dagalee yelatedogodomi Aneotedogoji, codaa me dagadiaa godiloikatidi leegodi niginoa gobeyacegeco, nige jinakatonaga Jesus. Aneotedogoji dinatitedogowa, joanigidaa leegodi me daga ikateda oko digidioka limedi me nigo leegotedi niginoa libeyacegeco, nigijo oko ane newiga maleedigicoateda Jesus. Aneotedogoji niige Jesus magaga yeletetema libeyacegeco nigidi oko me ikee me igenaga. <sup>26</sup>Joanigidaagee Aneotedogoji eotedibige me ikee me igenaga, codaa me yakadi me ikee me igenaga nigina oko ane nakato Jesus.

<sup>27</sup>Migica ane yakadi me dinabaketibece leegodi me igenaga? Jowoogotaga me digica ane yakadi! Pida igamige leegodi me digica ane yakadi me dinabaketibece? Leegodi agica ini ane igenaga daga leegodi me yotete liigenatakanegeco Aneotedogoji, pida leegodi me nakato Jesus, odaa ja igenaga. <sup>28</sup>Joanigidaa me jinataga oko ane igenaga leegodi eliwagatakanegegi, pida aleegodi degeyiwigadi inoatawece ane liigenatakanegeco Aneotedogoji.

<sup>29</sup>Aneotedogoji migepoka Noenogoditeda judeutedi? Agodagaga Noenogodi ina ane daga judeutedi? Ajawienatakanaga magaga Noenogodi nigina ane daga judeutedi. <sup>30</sup>Odaa jinataga mokiniwatece me Gonoenogodi. Eote me igenagatibigiwaji judeutedi anida eliwagatakanegegi, codaa me nigina ane daga judeutedi anagagida eliwagatakanegegi. <sup>31</sup>Ja jowoogotaga me godegenaga leegodi gotiwagatakanegegi. Enice, odaa agaleegica ane jaogate liigenatakanegeco Aneotedogoji? Okoo, ida ane jaogate! Leegodi gotiwagatakanegegi eo me jemaanaga mejiwagataga liigenatakanegeco Aneotedogoji.

### Abraão igenaga leegodi eliwagatakanegegi

**4** <sup>1</sup>Nigica jotigide icoolatigi gonelokodi Abraão, igamigida ica nimawenegegi me yakadi me igenaga lodoe Aneotedogoji? <sup>2</sup>Daga igenaga Abraão leegotedi loenataka anele, odaa domaga yakadi me dinabaketibece. Pida agica anigetigida leegodi daga dinabaketibece lodoe Aneotedogoji. <sup>3</sup>Igaataga mee Aneotedogoji lotaga, “Abraão nakato Aneotedogoji, odaa leegodi eliwagatakanegegi Aneotedogoji jegeote me igenaga.” <sup>4</sup>Nigina ane diba, oyedia. Nigina ane dibatege anogeedi, pida loojedi nigijo libakedi. <sup>5</sup>(Nigida moko agica anigetigida godoenatagitema Aneotedogoji aneo me leeditibige me godedia.) Nigina oko ane daga diba me docagatalo Aneotedogoji, pida nigeyiwagadi Jesus, odaa Aneotedogoji eote nigini oko me igenaga leegodi eliwagatakanegegi. Igaataga Aneotedogoji yakadi meote me igenaga nigina oko aninoa libeyacegeco.



<sup>6</sup>Davi idaa yalagata. Mee nigina oko Aneotedogoji aneote me igenaga, aigenaga daga leegodi degepaageo me igenaga. Codaa Davi yalagata nigica oko anida linikegi, mee,

<sup>7</sup>“Ninitibece nigina oko Aneotedogoji baanaga ixomagateetedice codaa me napitagadi nigicoa libeyacegeco.

<sup>8</sup>Ninitibece nigina oko ane daga nilagaditedeloco Aneotedogoji nigicoa libeyacegeco.”

<sup>9</sup>Aneotedogoji migijoka eote me ninitibigiwaji nigijo oko anoyakagidi lolaadi moikee me nepilidi? Ogoa, Aneotedogoji domige aagageote me ninitibigiwaji ina ane dogoyakagidi lolaadi? Ja jinataga aneyatigi ligegi Aneotedogoji lotaga, mee, “Abraão nakato Aneotedogoji, oada leegodi eliwagatakanegegi Aneotedogoji jegeote me igenaga.” <sup>10</sup>Igamigicatigi Aneotedogoji naga yakadi Abraão me igenaga? Migijo maleedigicatibige daga yakagidi Abraão lolaadi, ogoa, migijo naga yakagidi lolaadi? Aneotedogoji yakadi Abraão me igenaga nigijo maleedigicatibige daga yakagidi lolaadi. <sup>11</sup>Oada nigidiaagidi Abraão naga yakagidi lolaadi leegodi me liigenatakanegegi Aneotedogoji me ikee Aneotedogoji negeote me igenaga leegodi makaageyiwaagadi Aneotedogoji anigicatibige daga yakagidi lolaadi. Joanigidaa leegodi Abraão me micataga daga eliodi inatawece oko anonakato Aneotedogoji, aneote Aneotedogoji me igenagatibigiwaji, idaagida me dogoyakagidi lolaadi. <sup>12</sup>Abraão eledi micataga daga eniodi nigina oko anoyakagidi lolaadi, pida nigina modioteci anodaagee Abraão me nakato Aneotedogoji maleedigicatibige daga yakagidi lolaadi.

### **Aneotedogoji ane ligegi me yajigotediogi nigina ane eniwaगतakanaga**

<sup>13</sup>Aneotedogoji eote ligegite Abraão codaa nigica anida aneetege licogegi me nebi inatawece iigo. Aneotedogoji ageote nigida ligegiteta Abraão daga leegodi meyiwaगadi liigenatakanegeco, pida leegodi Abraão me nakato Aneotedogoji. Oada joanigidaa Aneotedogoji meote me igenaga. <sup>14</sup>Nigeote Aneotedogoji ligegitetege nigina anodiletibige digidokidata moyiwaगadi liigenatakanegeco Aneotedogoji me igenagatibigiwaji, oada agotigica jaoga gotiwaगतakanegegi. Codaa nigica ligegitedogogi Aneotedogoji agotigica niwaló. <sup>15</sup>Igaataga Aneotedogoji icota me yelatetema nigina anidiwa liigenatakanegeco midiwataga ane iditedini Moisés, pida agoyotete niigenatakanegeco. Pida nigina ane digicoateda liigenatakanegeco midiwataga, agica ane yakadi me laagetedipi leegodi dogoyoteteda nigidiwa niigenatakanegeco.

<sup>16</sup>Joanigidaa leegodi Aneotedogoji meote ligegitediogi nigina anonakato me daga ixomagatice nigina Aneotedogoji ane ligegi. Aneotedogoji eote nigida ligegi me yajigotediogi nogeedi inatawece anida aneetege licogegi Abraão leegodi Aneotedogoji idioka limedi meletedogodomi. Aneotedogoji aginoka yajigote nogeedi nigina anoyotete liigenatakanegeco Moisés, pida aagaga yajigote inatawece nigina anonakato digo mijotaga Abraão me nakato. Oada Abraão ja godiodi okotawece ane jinakatonaga Aneotedogoji. <sup>17</sup>Joanigidaa Aneotedogoji

lotaga mee, “Jao makaami eniodi eliodi noiigi.” Abraão nakato Aneotedogoji, odaa Aneotedogoji jegeote me godiodi. Aneotedogoji jiginiaa aneote émagaga me newigatace, codaa me yoe inoatawece niginoa analee jinataga.

<sup>18</sup>Aneotedogoji jegeote ligegite Abraão, meeteta, “Icota meliodi oko anida aneetege licogegi.” Abraão eyiwagadi nigijo ligegi Aneotedogoji meote me eniodi eliodi noiigi. Odaa Abraão idioka limedi me nibeotege Aneotedogoji meote nigijo ane ligegiteta, idaagidata me dagadiaa nibeotege mica lionigi, leegodi ja dagaxa moxiigodi. <sup>19</sup>Abraão ejinaga ipegiteloco monaniteci taalia nicaagape. Lolaadi agaleegica loniciwaga. Nagajo lodawa ane liboonagadi Sara eledi dagaxa mopake, ja nagaxatologo nicaagape iwaalo malee dinigaje. Naga yowo Abraão naga laxokodipi, pida idokee adinelio eliwigatakanegegi. <sup>20</sup>Codaa adawienataka micota nigijo ane ligegiteta Aneotedogoji. Pida idioka limedi me yoniciwadi metiwagataka, codaa dogetetalo Aneotedogoji. <sup>21</sup>Abraão ayawie Aneotedogoji mida nimawenegegi meote ane ligegiteta. <sup>22</sup>Joanigidaa leegodi Aneotedogoji meote Abraão me igenaga, leegodi eliwigatakanegegi.

<sup>23-24</sup>Nigijo nigegi anee, “Aneotedogoji eote me igenaga.” Nigida ligegi Aneotedogoji agijoka yalagateta Abraão, pida oko eledi yalagatedogowa. Aneotedogoji eote me godegenaga, nigina nige jinakatonaga Aneotedogoji, aneote me yewigatace Goniotagodi Jesus Cristo. <sup>25</sup>Aneotedogoji yajigo Jesus me yeleo leegodi gobeyacegeco. Nigidiaagidi Aneotedogoji ja yewikatititace eotedibige me yakadi meote me godegenaga.

### Aneotedogoji eote me godegenaga

**5** <sup>1</sup>Aneotedogoji eote me godegenaga leegodi me jinakatonaga. Joanigidaa leegodi Aneotedogoji meote mele godaalegena leegodi nigijo aneote Goniotagodi Jesus Cristo. <sup>2</sup>Goniotagodi Jesus Cristo ja yomoketedogodomi goligi miniga lodoe Aneotedogoji. Odaa natigide idioka limedi Aneotedogoji meletetedogodomi leegodi me jinakatonaga. Odaa godinitibece leegodi me inibeonagatege me godiwenigide godawanagaditetege Cristo. <sup>3-4</sup>Codaa godinitibece nige jawikodeega, igaataga jowoogotaga niginoa godawikodico owo me godoniciwadi me jibogatege eletidi godawikodico. Igaanige jixomagateenagatedijo niginoa godawikodico, odaa ja godixomagatice Aneotedogoji me godici. Odaa jegepaanaga jatitagati me inibeonagatege lanokegi Goniotagodi Jesus Cristo. <sup>5</sup>Nigida ane inibeonagatege agodinaale, igaataga Aneotedogoji godemaa. Aneotedogoji najigotedogowa Liwigo ane yelogodita godaalegena meliodi me godemaa.

<sup>6</sup>Igaataga nigijo maleedigicata gonimawenegegi dogokomaga idinewikatitaga, odaa Cristo jegenagi yeleotedogodomi, anoko abeyacagaga. Goniotagodi Jesus Cristo yeleo nigijo noko ane nibikota Aneotedogoji me lemegegi. <sup>7</sup>Agica oko ane yeleotema eledi oko ane igenaga. Pida ejimetigica oko anabo laalegena me yeleotema eledi oko anele. <sup>8</sup>Pida Aneotedogoji бага ikee meliodi me godemaa nigijo Cristo naga yeleotedogodomi, idaagida moko abeyacagaga.

<sup>9</sup>Leegodi Cristo me yeleo, odaa Aneotedogoji jegeote me godegenaga. Odaa natigide agalee dakaketema Cristo me noga ica Aneotedogoji lélagatetema gobeyacegeco. <sup>10</sup>Aneotedogoji eote moko lokaagetedi leegodi me yeleetedogodomi Lionigi nigijo maleegoko laxakawepodi. Joanigidaa leegodi dagadiaagica lagaliigi meote godewiga leegodi Lionigi naga yewigatace. <sup>11</sup>Pida anigidokida. Aagaga godinitibece leegodi anodaageeteda Aneotedogoji. Jogoko lokaagetedipi leegodi nigijo aneote Goniotagodi Jesus Cristo.

### Jiciaceekenagatiwage Adão ijaa Cristo

<sup>12</sup>Nigina noiigi digoina iigo owo ane beyagi leegodi onijoteci goneleegiwa ane liboonagadi Adão. Odaa leegodi nibeyacaga, jigida némaga. Odaa inatawece oko agica ini ane daga yeleo leegodi inatawece inoa libeyacegeco. <sup>13</sup>Anigicatibige Moisés daga iditedini Aneotedogoji liigenatakanegeco, niginoa libeyacegeco nigijo noiigi. Pida Aneotedogoji agica daga laagetedipi leegodi libeyacegeco nigijo oko. Igaataga ate nigicoa me yajigotediogi liigenatakanegeco. <sup>14</sup>Pida nigijo maleegijo Adão negepaagicota Moisés, nigida ica némaga. Inatawece oko nigo, agica ane iwoko, idaagee me digicata libeyacegegi digo mijotaga Adão libeyacegegi, leegodi nigijo me degeyiwaagadi Aneotedogoji ane liigenatakanegegi.

Adão liciagi nigijoa Goneleegiwa aneno nigidiaagidi, Aneotedogoji ane niwakatee. Igaataga nigijoa itoataale goneleegiwadi ane loenatigi icotiogi inatawece oko. <sup>15</sup>Pida nigijo libeyacegegi Adão baadaga liciagi nigijo liboonigi Aneotedogoji. Odaa eliodi oko nigo leegodi onijoteci nigijo goneleegiwa, ane Adão, ane yotigimade Aneotedogoji. Pida Aneotedogoji dagaxa meletedogodomi, odaa yajigotediogi eliodi oko nogeedi ane daga domigica nimawenegegi moyakadi, pida leegodi me godiwikode onijoatece goneleegiwa ane Jesus Cristo. <sup>16</sup>Odaa nigijo gonogeeditalo Aneotedogoji otegeaagaga jiciaceekenagatege nigijo anigotogowa libeyacegegi Adão. Igaataga libeyacegegi onijoteci goneleegiwa eo Aneotedogoji me laagetedipi, codaa me iloikatidi eliodi oko leegotedi libeyacegeco. Pida Aneotedogoji aagaga yajigotediogi nogeedi eliodi oko anowidi libeyacegeco. Gonogeedi ane najigotedogowa Aneotedogoji nigina meote me godegenaga. <sup>17</sup>Ewi me leegodi libeyacegegi onijoteci goneleegiwa odaa ja diiticogi némaga me dibatogowa. Pida nigijo aneotedogodomi Jesus dagaxa meletogodomi, aliciagi Adão anagaga yoetogodomi. Joanigidaagee, Aneotedogoji eliodi meletogodomi, codaa eote gonogeedi nigina ane daga domigicata gonimawenegegi me jakataga. Joanigidaa gonogeedi nigina meote me godegenaga. Odaa nigina oko anodibatege nogeedi idiokaanaga limedi me newiga miniwataga, codaa niigenatakanaga leegodi onijoatece goneleegiwa Jesus Cristo ane loenatagi.

<sup>18</sup>Ja jinataga me leegodi onijoteci goneleegiwa ane daga yotete liigenatakanegegi Aneotedogoji, odaa Aneotedogoji ja laagetedipi codaa icota me iloikatidi inatawece oko. Odaa idaagee, leegodi onijoatece goneleegiwa ane igenaga, Aneotedogoji ja yakadi meote inatawece oko me igenagatibigiwaji, codaa meote me newigatace. <sup>19</sup>Leegodi onijoteci goneleegiwa ane

degeyiwagadita liigenatakanegegi Aneotedogoji odaa eo eliodi oko mabeyacagaga. Odaa idaagee, leegodi onijoatece goneleegiwa aneyiwagadi Aneotedogoji, odaa Aneotedogoji jegeote meliodi oko igenagatibigiwaji.

<sup>20</sup>Aneotedogoji iige Moisés me iditedini liigenatakanegeco eotedibige me ikeetediogi oko minoa libeyacegeco. Joanigidaageo oko mepaanaga owote libeyacegeco. Odaa nigijo naga dagaxa libeyacegeco nigina oko, Aneotedogoji jagaga dagaxa me ikeete me dagaxa meletetema oko. <sup>21</sup>Joanigidaa libeyacegeco oko mida loniciwagateloco, leegodi meo me yeleo. Pida idokee Aneotedogoji me dagaxa meletedogodomi, odaa jegeote me godegenaga, godiciagi Cristo, codaa meote godewiga ane dagadiaagica liniogo Miniwataga, leegodi nigijo ane loenatagitedogodomi Goniotagodi Jesus Cristo.

### Gela godewiga leegodi Cristo

**6** <sup>1</sup>Enice, amiida ica ane dagaxa mele me jaoga? Domige midapaga jiiigaticogi me jaoga ane beyagi, me jaogatibige me ikee Aneotedogoji me dagaxa meletedogodomi? <sup>2</sup>Ayakadi digidaagejinaga! Igaataga godiciagi nigina oko émegegi ane dagadiaa yakadi meo ane beyagi. Odaa ayakadi digidioka limedi me jaoga ane beyagi. <sup>3</sup>Doane mele mowoogotitiwaji. Nigijo naga idinilegenaga, jikeenaga moko nepilidi Jesus Cristo, odaa micataga daga godemagawa. <sup>4</sup>Joanigidaagee, nigijo naga idinilegenaga, micataga daantaga godelo, odaa micataga daga godoomatewa nogonaligitedini Cristo. Eote magaga godewigatace, ja gela anejinaga, digo mijoataga Cristo naga yewigatace leegodi nimawenegegi Eliodi ane jopooga.

<sup>5</sup>Nige micataga daga godemagawa Cristo, nigidiaagidi godewikagawa, odaa ja gela anejinaga, digo mijoataga Cristo me yewigatace. <sup>6</sup>Igaataga jowoogotaga Cristo me yeletedogodomi madataga nicenaganagate. Odaa nigijo jotigide anejinaga, aneo me jaoga ane beyagi, ja ma, micataga daga lemagawa Cristo madataga nicenaganagate, nigijo naga yeleo. Odaa nigina nibeyacaga agaleegica loniciwagatogoloco. <sup>7</sup>Igaataga nigina oko naga yeleo, jaganipetema loniciwaga nibeyacaga.

<sup>8</sup>Nige micataga daga godemagawa Cristo, odaa ajawienatakanaga magaga icota me godewikagawa. <sup>9</sup>Igaataga jowoogotaga Cristo me yewigatace, odaa agalee yeleo. Leegodi némaga agaleegica loniciwagatologo. <sup>10</sup>Igaataga nigijo naga yeleo, yeletetema nibeyacegeco, odaa onijoteci me yeleo, odaa agalee leeditibige daga yeletace. Pida iniwa me yewiga me iwenigide Aneotedogoji. <sup>11</sup>Joanigidaagee akaami eleditetiwaji leeditibige madiniciaceekenitege oko baanaga nigo, ane dagadiaa yakadi mowo ane beyagi. Pida adiniciaceekenitege nigina oko ane newiga mawenigidenitetiwaji Aneotedogoji, leegodi me gadexocitege Goniotagodi Jesus Cristo.

<sup>12</sup>Odaa jinaga domigikani nibeyacaga daga iige gadaalegena mawiite niginoa ane beyagi ane lidagataka gadolaadi anicota me daa. <sup>13</sup>Codaa jinigikanitece gadolaadi nibeyacaga me ibake meo ane beyagi. Pida

adinajicitalo Aneotedogoji micataga oko ane nigo baanaga newigatace. Ajjicitalo inatawece gadolaadi me ibake mawii ane igenaga. <sup>14</sup>Nibeyacaga ayakadi daga gadiigeni. Leegodi Aneotedogoji dagaxa meletedagadomi, odaa adibatedagagi daga leegodi me iwagati niigenatakanegeco ane nadeegi Moisés. Pida dibatedagagi leegodi meliodi meletedagadomi.

### Leeditibige me jaoga ane igenaga

<sup>15</sup>Aneotedogoji dibatedogogi leegodi dagaxa meletedogodomi, adibatedogogi daga leegodi mejiwagataga nigijoa niigenatakanegeco ane nadeegi Moisés. Nigeletedogomi, odaa agodigica liaagi ina me jaoga ane beyagi? <sup>16</sup>Owoogotitwaji nigina madinajicita nigina ganiotagodi makaami liotagipi, nigina ane iwagatitwaji odaa jiginiaa ane gadiigeni. Yakadi me awiitetiwaji ane beyagi, pida бага gadelewi, codaa idiokaanaga limedi me leegitalo motonitedice Aneotedogoji. Ogoa domige iwagati Aneotedogoji, odaa dibatedagagitiwaji, codaa eote me gadegenakitiwaji. <sup>17</sup>Nigijjo jotigide akaami liotagipi nibeyacaga, codaa adomagakati mikani. Pida iniotagodeegatalo Aneotedogoji me iwagatitewaji catiwedi gadaalegena nigijjo niigaxinaganegeco anoditece gotiwagatakanegegi anetigadiigaxinitece. <sup>18</sup>Joanigidaa Aneotedogoji me yajigotedagawa gadoniciwaga mikani mawii ane beyagi. Odaa jagadinajicitalo makaami liotagipi Aneotedogoji mawii ane igenaga. <sup>19</sup>Gadotaganegenitiwaji micataga okanicodaagica oko jaotibige me jakadi me gadaxawani mowoogoti ane jema mejitagawa, leegodi agadoniciwati me iwagatakani. Nigijjo jotigide adinajicitiwaji manigopeligitiwage, awiite inoatawece ane degeleleda, codaa agalee domagakati mikani mawii ane beyagi. Pida nigina natigide jagadinajicitiwaji makaami liotaka Aneotedogoji mawii ane igenaga. Odaa jigidaa miniokaaginiwateda makaami nepilidi.

<sup>20</sup>Igaataga nigijjo maleegakaami liotagipi nibeyacaga, agica daga gadowoogotiwaji dagawii nigica ane igenaga, leegodi nigica ane igenaga aiige gadewiga. <sup>21</sup>Amiini ica ganigaanyetema ijoa gadoenataka ane beyagi? Nigijjo gadoenataka ane beyagi owo manibolikitiwaji nigina natigide, codaa nigina ane beyagi owo oko me yeleo, odaa idiokaanaga limedi me leegitalo me yototedice Aneotedogoji. <sup>22</sup>Pida nigina natigide Aneotedogoji ja yajigotedagawa gadoniciwaga mikani mawii ane beyagi, odaa jagakaami liotagipi Aneotedogoji. Odaa iniokaaniginiwateda Aneotedogoji makaami nepilidi. Joanigidaa leegodi midiokaanaga limedi me gadewikitiwaji Miniwataga. <sup>23</sup>Leegodi loojedi nibeyacaga ane jibagatege бага néмага, odaa idiokaanaga limedi me leegitalo Aneotedogoji me jotonagatedice. Pida liboonigi Aneotedogoji ane najigotedogowa бага godewiga ane dagadiaagica liniogo Miniwataga, leegodi nigijjo loenatagitedogodomi Goniotagodi Jesus Cristo.

### Nadonegegi ane godiigaxitece

**7** <sup>1</sup>Inioxadipi. Akaamitawece jogowoogoti anejatigi igegi leegodi owoogoti nigijoa liigenatakanegeco Aneotedogoji. Nigina oko leeditibige me diotece niginoa niigenatakanegeco nigina malee yewiga. <sup>2</sup>Liciagi nagana iwaalo wadonaga. Niigenatakanegegi wadonadi iige me iniokini mida aneetege nigini lodawa nigina malee yewiga. Pida nige yeleo nigijo lodawa, oada nagani iwaalo ja iwoko nigijo niigenatakanegegi wadonadi ane yexocagaditege lodawa. <sup>3</sup>Pida nagani iwaalo nige lodawa eledi goneleegiwa malee yewiga nigijo бага lodawa, oada nagani iwaalo бага dogolagataka. Pida nige yeleo nigijo lodawa, oada ja iwoko nigijo niigenatakanegegi me wadonagalo. Oada ja yakaditace me wado, agalee dogolagataka.

<sup>4</sup>Inioxadipi, joanigidaageetiawaji. Nagana iwaalo iwoko nigijo niigenatakanegegi me wadonagalo, leegodi naga yeleo lodawa. Joanigidaagaga enitiwaji gadiwokoni nigijoa niigenatakanegeco ane nadeegi Moisés, leegodi naga micataga daga gademagawa Cristo. Oada jagakatitiwaji mida anenitege Nigijoa ane yeleo, pida yewigatace nigidiaagidi, eotedibige me jakataga me jaoga Aneotedogoji ane yemaa. <sup>5</sup>Igaataga nigijo malee godiige golidagataka ane beyagi, oada liigenatakanegeco Aneotedogoji jogowo me jowoogatibige ane igenaga. Pida niginoa golidagataka owo mepaanaga jaoga ane beyagi. Oada nigijoa gobeyacegeco etigodadeegita godemaga, oada idiokaanaga domaga limedi me jotonagatedice Aneotedogoji. <sup>6</sup>Macataga nagana wajekalo naga iwoko niigenatakanegegi me wadonagalo, oko jigidaagejinaga agalee leeditibige daga jiwagatece nigijoa liigenatakanegeco Aneotedogoji anijo mida loniciwagatogoloco. Joanigidaa leegodi agalee jibaagatema Aneotedogoji anejinaga nigijo jotigide me jiwagatece niigenatakanegeco ane diniditedini. Pida nigina natigide jibaagatema Aneotedogoji me gela anejinaga me godewiga ane najigotogowa Aneotedogoji Liwigo.

### Jegepaanaga jaoga ane beyagi nigina naga domaga jowoogotaga liigenatakanegeco Aneotedogoji

<sup>7</sup>Domige yakadi mejinaga inoa liigenatakanegeco Aneotedogoji me beyagi? Ayakadi digidegejalagatigi gogegi! Igaataga liigenatakanegeco Aneotedogoji onikeetogowa nibeyacaga. Igaataga daaditogodita niginoa liigenatakanegeco me beyagi nigina me idocetema niginoa ane nepilidi eledi oko. Agotaga jowoogodi me beyagi, nigina me jemaa ane nebi eledi oko. <sup>8</sup>Pida leegodi niginoa liigenatakanegeco Aneotedogoji (me jowoogodi ane igenaga), oada nibeyacaga ane idei catiwedi yaalegena jegeo me idocetema ane nebi eledi oko. Igaataga daaditigicoateda niigenatakanegeco, nibeyacaga ane idei catiwedi yaalegena taga liciagi nigina émegegi. <sup>9</sup>Igaataga nigijo jotigide emegeeta ajowoogodi

niginoa liigenatakanegeco Aneotedogoji, odaa eetibece ele, idinitibeci. Pida nigijoo naga jowoogodi ane diitigilo Aneotedogoji liigenatakanegeco, odaa nibeyacaga ane idei catiwedi yaalegena ja micataga daga gela mini, joanigijaaigijotigi naga jeemitetece minoa ibeyacegeco. Odaa ja micataga daantaga ideleo.

<sup>10</sup>Aneotedogoji najigotodogowa liigenatakanegeco mowo godewiga. Pida nigidiwa liigenatakanegeco ododigotiwa micataga daantaga ideleo. <sup>11</sup>Nibeyacaga ane idei catiwedi yaalegena ibake nigijoo liigenatakanegeco Aneotedogoji me idinaale. Igaataga jiletibige digidokidata nigina me jotete Aneotedogoji liigenatakanegeco oditaga jigida yewiga ane dagadiaagica liniogo. Micataga nibeyacaga ane idei catiwedi yaalegena daga ibake Aneotedogoji liigenatakanegeco me ideloadi.

<sup>12</sup>Niginoa niigenatakanegeco oikee anodaageeteda Aneotedogoji, onidatecibeci liigenatakanegegi ikee anodaageeteda. Codaa onidatecibeci liigenatakanegegi ewi, codaa mele. <sup>13</sup>Enice, domigina anele ideloadi? Odaa aleegodi nigijoo niigenatakanegeco midegeji micataga émegegi, pida leegodi nibeyacaga ane idei catiwedi yaalegena. Nigijoo nibeyacaga ane idei catiwedi yaalegena ibake liigenatakanegeco Aneotedogoji anele meo me jeemitetece me leegitalo Aneotedogoji me jototedice. Joanigidaa naga dinikee nigica anodaagee nibeyacaga. Codaa liigenatakanegegi Aneotedogoji ikee me dagaxa me beyagi nigina nibeyacaga.

#### Paulo agica loniciwaga meo anele

<sup>14</sup>Jowoogotaga me Aneotedogoji Liwigo ane najigotogowa niginoa niigenatakanegeco. Pida nigida me ee eemoda oko agamalegegi, codaa ee liotagi nibeyacaga, agica inimawenegegi daga jika me jao ane beyagi. <sup>15</sup>Ajowoogodi nigica aneji. Igaataga ajao nigina ane jemaa me jao, pida jao inokina ane daga domaga jemaa me joe. <sup>16</sup>Pida nigina me jaote nigina ane beyagi ane daga jemaa, jiginaa ikee me jowoogodi niginoa niigenatakanegeco mele. <sup>17</sup>Nigina me jao nigina ane daga jemaa, eledi ikee maleedegemegee ane jao, pida loniciwaga nibeyacaga ane idei catiwedi yaalegena idiige me jao nigina ane daga jemaa. <sup>18</sup>Igaataga jowoogodi nigina anele agica meetaga catiwedi yaalegena. Idaagee daga jemaa me jao anele, pida agica inimawenegegi daga jao. <sup>19</sup>Igaataga ajaote anele ane jemaa me jao, pida jao ane beyagi ane daga domaga jemaa me jao. <sup>20</sup>Nige jao nigina ane daga jemaa me jao, anegemegee ane jao, pida loniciwaga nibeyacaga ane idei catiwedi yaalegena idiige me jao.

<sup>21</sup>Joanigidaa midatibece meji catiwedi yaalegena. Nigina me domaga jemaa me jao anele, pida inoka jakadi me joletibige nigica ane beyagi. <sup>22</sup>Igaataga emegeeta domaga jemaa Aneotedogoji liigenatakanegeco. <sup>23</sup>Pida jeemiteta noniciwaga ilaligi, ane idei catiwedi yaalegena. Nigida noniciwaga micataga daga idelege liigenatakanegeco Aneotedogoji ane jemaa. Nigida noniciwaga idiige me jao ane beyagi, odaa agica emaga yoniciwaga daga jika me jao ane beyagi. <sup>24</sup>Ee oko anidioka limedi magecagalo! Migica ane yakadi me idogaticce midataga ida noniciwaga ane idadeegita néмага, codaa aneo midiokaanaga limedi me

leegitalo Aneotedogoji me jototedice? <sup>25</sup>Iniotagodetalo Aneotedogoji, leegodi Goniotagodi Jesus Cristo jiginia idogatedice mejoteloco loniciwaga nibeyacaga.

Nigijo jotigide me yowoogo me jotete liigenatakanegeco Aneotedogoji. Pida inoka jao ane beyagi, leegodi loniciwaga nibeyacaga.

### Aneotedogoji Liwigo najigotogowa godoniciwaga

**8** <sup>1</sup>Ja jinataga Goniotagodi Jesus Cristo me godogatedice mejonagateloco loniciwaga nibeyacaga, odaa Aneotedogoji agalee godiloikatidi leegotedi gobeyacegeco, oko ane godexogotege Jesus Cristo, ane dagadiaa iniwinagatalo epaa lidekeco godaalegena, pida jibaagamema Liwigo Aneotedogoji. <sup>2</sup>Igaataga Aneotedogoji Liwigo najigotogowa gela godewiga leegodi me godexogotege Jesus Cristo. Odaa loniciwaga Liwigo Aneotedogoji godogaticice mejonagateloco loniciwaga nibeyacaga ane nadeegi godemaga. <sup>3</sup>Ajakataga daga jaagataga nigina nibeyacaga ane idei catiwedi godaalegena daga leegodi me jotetenaga liigenatakanegeco Aneotedogoji. Pida Aneotedogoji niige epaa Lionigi aneote me goneleegiwa digo mokotaga, pida baadigicata libeyacegegi. Niwakatee Lionigi me yaagadi gobeyacaga, eote lawikodigi Lionigi leegodi gobeyacaga. <sup>4</sup>Aneotedogoji niige Lionigi me yeleotedogodomi, eotedibige mida gonimawenegegi me jaoga ane niigetogowa liigenatakanegeco, nigijo ane igenaga. Natigide agalee jaoga ane okomaga jemaanaga me jaoga, pida jaoga nigina ane niigetogowa Aneotedogoji Liwigo.

<sup>5</sup>Igaataga nigina anowo anepaa lidekeco laalegena, inokina moyowo mowo. Pida nigina anowo ane yemaa Aneotedogoji Liwigo, idioka limedi moyowo nigica ane iigetigi Aneotedogoji Liwigo. <sup>6</sup>Igaataga nigina aninoka oyowo anepaa yemaa laalegena mowo, joanigidiaagidi bigidiokaanaga limedi moyototedice Aneotedogoji nige nigo. Pida nigina anoyowo nigica ane yemaa Aneotedogoji Liwigo, bigidiokaanaga limedi me newiga Miniwataga, codaa midioka limedi mele laalegenali. <sup>7</sup>Igaataga nigina aninoka yowoteda lakataga ane beyagi ane yemaa laalegena, joaniginia laxakawa Aneotedogoji, codaa agoyiwagadi Aneotedogoji liigenatakanegeco, otegexaagaga yakadi meniwigatakanaga. <sup>8</sup>Nigina anodioteci epaa lidagataka laalegena, agica nimawenegegi dogoyocaganega Aneotedogoji.

<sup>9</sup>Odaa akaamitiwaji ane digiwagati niginoa anepaa yemaa gadaalegenali, pida naga iwagati Aneotedogoji Liwigo, jigikeeni mewi me digeladetiwigaji Aneotedogoji Liwigo. Nige digicata Cristo Liwigo minitaga nigini oko, nigini oko anebi Cristo. <sup>10</sup>Pida Cristo nige itediwigajitiwaji, odaa icaagica nige gadelewi leegodi nibeyacaga, odaa Aneotedogoji Liwigo yajigotagawatiwaji gela gadewiga leegodi Aneotedogoji jegeote me godegenaga. <sup>11</sup>Codaa nige itiwagajitiwaji Aneotedogoji Liwigo, nigijo aneo Jesus me yewigatace, odaa Aneotedogoji, aneote Cristo me yewigatace, aagageote me gadewikitace, codaa eote gela gadolaadi, leegodi Liwigo ane itiwagajitiwaji.

<sup>12</sup>Enice inioxoadipi, jinaga domaga jiwagatece anepaa lidagataka godaalegenali. <sup>13</sup>Igaataga nige iwitecetiwaji ane lidagataka gadaalegenali,



agica dagawienatakanitiwaji me gadelewi, codaa midiokaanaga limedi motonitedice Aneotedogoji. Pida Liwigo Aneotedogoji yakadi me yajigotagawa ganimawenegegi me ikani mawii niginoa anakamaga galidagataka mawiite. Odaa nigikani mawiite niginoa gadaalegenali lidekeco ane beyagi, odaa idiokaanaga limedi me gadewikitiwaji miniwataga Aneotedogoji.

<sup>14</sup>Igaataga inatawece nigina oko ane iige Aneotedogoji Liwigo, joanigidiaa lionigipi Aneotedogoji. <sup>15</sup>Igaataga adakatiwogoji niwigo aneo moko ageleemagipi. Pida jibagatege Aneotedogoji Liwigo aneo me dibatedogowa moko lionigipi, codaa eo me japaawagatibige Aneotedogoji mejinaga, “Eiodi, Eiodi yemaanigi!” <sup>16</sup>Liwigo Aneotedogoji eledi meetogowa catiwedi godaalegena moko lionigipi Aneotedogoji. <sup>17</sup>Leegodi moko lionigipi Aneotedogoji, odaa ane nebi, oko aagaga gonebi. Nigica Aneotedogoji lagajegitema Cristo, odaa oko gonebianagawa nige limedi me dibatetege nigica nagajegi. Igaataga nige jawikodeega leegodi me jibaagatema Cristo, digo mijoataga me dawikode, odaa oko jawanagatege nigoiweningide.

### Aneotedogoji dogetetedogowa

<sup>18</sup>Igaataga niginoa godawikodico digoina iigo, ejidaga yakadi daga jibogotagatege nigica Aneotedogoji anicota me najigotedogowa, anicota me nikeetedogowa, nige limedi me dogetetedibogoji. <sup>19</sup>Igaataga inoatawece ane liidagatajedi Aneotedogoji onibeotege codaa eliodi moyemaa me age nigica noko nige yelogotee lionaga. <sup>20-21</sup>Igaataga inoatawece Aneotedogoji liidagatajedi jigijo me digica jaogate. Aleegodi degepaagoyemaa me liciagi, pida Aneotedogoji yemaa migote. Aneotedogoji eote me inibeonagatege micota noko meote me dagadiaa yeleo okanicodaagica niginoa ane liidagatajegi. Codaa agalee neladi, pida inoatawece ja iwoko lawikodico, odaa ja ninitibigiwaji lodoe Aneotedogoji, digo mokotaga anoko lionigipi.

<sup>22</sup>Macataga nagana iwaalo baanaga nikaticobece laadi naga dineemite me nipegi menitini lionigi ane nibeotege. Jigidaagee, inoatawece ane Aneotedogoji liidagatajedi aagaga onikaticobece laadi nigina monibeotege nigica noko nige dibatedogogi anoko lionigipi. <sup>23</sup>Aginokinoa eletidi liidagatajedi Aneotedogoji menegegi onikaticobece laadi nigina monibeotege nigica noko. Pida oko baanaga jibagatege Liwigo Aneotedogoji, anodoejegi gonogeeditalo Aneotedogoji, oko aagaga eliodi me inikanagaticobece godaadi nigina me inibeonagatege nigica noko Aneotedogoji nige dibatedogogi anoko lionigipi, odaa jagaga jibagatege gela godolaadi. <sup>24</sup>Inibeonagatege gela godolaadi leegodi nigida gela godewiga. Nige naga jinataga nigica ane inibeonagatege, odaa agalee leeditibige daga inibeonagatege, igaataga agica ane nibeotege nigina baanaga eliodi me nadi. <sup>25</sup>Pida nige inibeonagatege nigica ane digica me jinataga, leeditibige me idinatiigatalo godawikodico nigina me inibeonagatege.

<sup>26</sup>Aneotedogoji Liwigo aagaga godaxawa, leegodi agica godoniciwaga. Codaa ajowoogotaga nigica anodaagee me jotaganegenaga Aneotedogoji. Joanigidaa leegodi Aneotedogoji Liwigo me dipokotogoloco. Codaa dinoniciwagadi me

dipokotogoloco, ajakataga me jelogotaga nigica anodaagee me dipokotogoloco, pida бага jeemiteegatece catiwedi godaalegena. <sup>27</sup>Aneotedogoji naditediwece catiwedi laalegena oko, codaa yowoogodi lowooko Liwigo. Igaataga Aneotedogoji Liwigo nigina me dipokoteloce loigi, inoka dipokota ane yemaa Aneotedogoji.

<sup>28</sup>Jowoogotaga Aneotedogoji me ibake inoatawece niginoa ane goninyaco meote aneletema nigina oko anoyemaa Aneotedogoji, aneniditediogi me lionigipi, anakaa lowoogotetece. <sup>29</sup>Igaataga nigina Aneotedogoji baanaga iolatedicoace, iomagaditedicoace meote me liciagi Lionigi. Eotedibige Lionigi me liidaga liwigotigilo eliodi nioxoadipi. <sup>30</sup>Nigina ane iomagaditedicoace, eniditediogi me lionigipi. Odaa nigina aneniditediogi, jegeote me igenagatibigiwaji. Odaa nigina ane igenagadi, iwenigide yawanagaditetege Cristo.

### Ica anodaagee Aneotedogoji me godemaa

<sup>31</sup>Ja jinataga Aneotedogoji me dibatedogowa moko lionigipi, codaa me godaxawa, odaa domigica ane yakadi me godigeke? <sup>32</sup>Aneotedogoji ayoli Lionigi, pida yajigo me yeletedogodomi. Jinataga Aneotedogoji me yajigo epaa Lionigi, odaa jowoogotaga me najigotedogowa me gonogetedi inoatawece niginoa ane jopoogatibige. <sup>33</sup>Domigica ane yakadi me laagetedipi liomagataka Aneotedogoji? Agica ane yakadi. Leegodi ijaagijoa Aneotedogoji yelogodi me digicata libatiigi nigidi noiigi. <sup>34</sup>Domigica ane yakadi me godiloikatidi leegodi gobeyacegeco? Agica ane yakadi, leegodi Cristo ja yeletedogodomi, codaa me yewigatace, odaa etiniwa liwai libaagadi Aneotedogoji, dipokotedogoloco miniwataga Aneotedogoji. <sup>35</sup>Odaa, domigica ane yakadi me godawalacetege Cristo ane godemaa? Domige godawikodico, ogoa domige inoa godaganaga, ogoa domige ina metigodiatetibeci, ogoa domige nigigi, ogoa domige ina maniaditibige godowoodagagi, ogoa domige ina mida ane idoigata, ogoa domige ina modoletibige metigodeloadi; inoatawece inoa ganicinoa, domigoyakadi metigodawalacetege Cristo? Ee meji agica ane yakadi. <sup>36</sup>Joanigidaa aneeta Aneotedogoji lotaganagaxi, “Akaami leegodi, inoatawece nokododi odoletibige metigodeloadi. Ododigotogowa micataga nigina waxacoco anoyadeegiticogi nematakanagaxi.”

<sup>37</sup>Pida ja godixomagatema inoatawece ane goninyaco, odaa agaleegica ane godakadi, leegodi Cristo me godemaa. <sup>38-39</sup>Igaataga jowoogodi, codaa ajawienataka me digica ane yakadi me godawalacetege Aneotedogoji ane godemaa. Otegeaagaga nemaga ayakadi, otegeaagaga godewiga, migetaga aanjotedi, migetaga nigicoa ane niigenatakanaga digoida ditibigimedi, otegeaagaga nigicoa niwicidi ane dagaxa me notoetedi, migetaga anigetigida goninyaagi nigina natigide, migetaga goninyaagi anigida noko, otegeaagaga gaantokaagidi ane ideidi ditibigimedi, otegeaagaga aninoa digoina iigo, otegeaagaga anigetigidi niginoa eletidi Aneotedogoji

loenataka. Agica ane yakadi me godawalacetege Aneotedogoji ane godemaa. Codaa Goniogodi Jesus Cristo ja ikee Aneotedogoji meliodi me godemaa.

### Noiigi Aneotedogoji ane iolatedice

**9** <sup>1</sup>Ejitece anewi leegodi ee nebi Cristo. Aneotedogoji Liwigo eo me jowoogodi me jao ane igenaga. Joanigidaa nikeetiwa me daga jiwitaka. <sup>2</sup>Eliodi me ee agecagalo, jilee yaalegena codaa aliditini, leegodi emaga yoiigi. (Ee agecagalo leegodi modowocetege ane domigigotediogi Aneotedogoji me igenagadi). <sup>3</sup>Emegeeta domegeliotitibece me jemaa Aneotedogoji daga idixoo, codaa daga idawalacetege Cristo leegodi yoiigi, migetagaleegaga yaxawa. <sup>4</sup>Yoiigi, loiigi Israel. Aneotedogoji iomagaditedicoace meote me lionigipi, codaa me dinikeetediogi anodaageeteda. Aneotedogoji ja ikeetediogi ane yemaa migote loiigi, codaa me yajigotediogi liigenatakanegeco. Aneotedogoji ja ikeetediogi anodaagee modogetetalo minitaga ligeladi, codaa eote ligegitetege. <sup>5</sup>Nigidi noiigi ida aneetege licogegi jotigide godaamipi, goneleegiwadi gonegaga, ane dinikeetediogi Aneotedogoji. Cristo ida aneetegege licogegi miditaga, codaa inaagina nigidi noiigi. Ijaagijoa Cristo Gonoenogodi, iige inoatawece. Inatawece oko domaga leeditibige midioka limedi modogetetalo. Odaa jigidaagee. (Amém.)

<sup>6</sup>Pida ageji me digicota ane ligegi Aneotedogoji. Igaataga aginatawece loiigi Israel iomagaditedice Aneotedogoji me loiigi. <sup>7</sup>Codaa aginatawece anida aneetege licogegi mijotaga Abraão ewi me lionigipi Aneotedogoji. Igaataga Aneotedogoji meeteta Abraão, “Inokina anida aneetege licogegi gadionigi Isaque, bejijitioigi mida aneetege gadicogegi.” <sup>8</sup>Digawini ane diitigi, nigaanigipawaanigi ane lanikadi miditaga noiigi Israel, aginatawece lionigipi Aneotedogoji. Pida inokina mida aneetege licogegi Abraão nigina anenitini leegodi me ligegi Aneotedogoji, inokina me dibatetege Aneotedogoji mewi me loiigi. <sup>9</sup>Leegodi Aneotedogoji meote nigida ligegitetege Abraão, “Nigeledi nicaagabi, idopitacijo, odaa Sara jigicaa lionigi.”

<sup>10</sup>Pida anigidokidata. Rebeca ijoo itoataale lionaga ijokijota naniodi, gonelokodi Isaque. <sup>11-12</sup>Pida Aneotedogoji ikee me iolatedice oko ane yemaa me iolatedice, odaa meeteta Rebeca, “Nigica liidaga, liotagi nigica loxooxegi.” Aneotedogoji eote ligegitetege nigijo maleedigicatibige degenitiniwace nigijo nigaanigipawaanigi, maleedigica dogoyakadi mowote gaantigini anele, migetaga ane beyagi. Joanigidaagee Aneotedogoji me ikee me iolatedice oko leegodi mepaa yemaa meniditeta, idigida aleegodi ane loenataka nigina oko. <sup>13</sup>Joanigidaageeta lotaga Aneotedogoji me diniditelo,

“Jemaa Jacó,  
pida yelegedi Esaú.”

<sup>14</sup>Aneotedogoji domige igenaga ina me iolatedicoace ina oko anepaa yemaa? Ayakadi digidegejalagati gogegi! <sup>15</sup>Igaataga Aneotedogoji meeteta Moisés, “Jiwikode nigina oko ane jemaa me jiwikode. Codaa jao me Ee eletema nigina oko ane jemaa me Ee eletema.” <sup>16</sup>Aneotedogoji iolatedice oko aleegodi nigina oko miniaa yemaa, otegeaxagaga leegodi ane loenataka.


Pida Aneotedogoji iolatedice oko leegodi me iwikode. <sup>17</sup>Igaataga diniditeloce lotaganagaxi Aneotedogoji nigijo ligegite Faraó, meeteta, “Joanigidaa leegodi me jao makaami inionigi-eliodi, jaotibige me jikee inimawenegegitece nigijo ganinyaagi, codaa me jaotibige minatawece oko digoina iigo oyowoogodi Iboonagadi.” <sup>18</sup>Odaa Aneotedogoji iwikode nigina ane yemaa me iwikode, yakakagadi laalegena nigina ane yemaa me yakakagadi laalegena.

**Inatecibece oko Aneotedogoji iwikode, inaageledi baga iloikatidi**

<sup>19</sup>Yakadi mini nigina akaamitiwaji aneetiwa, “Nige nigidaagee, amica ane yakadi me dakapetege Aneotedogoji ane yemaa, enice igaamee ina Aneotedogoji malee dilaagetete oko?” <sup>20</sup>Pida yokaagedi. Nigida makaami minakaamita oko. Odaa agakati dagadinotigimadenitege Aneotedogoji. Igaataga nigina ane noenatagi ayakadi degeeta nigina noenatagodi, “Igaamee ina midegemiiitiwa madoeni?” <sup>21</sup>Nigina niwilanaganaga ane iwila boote ida nimawenegegitece me iwila ane yemaa migota me iwila napaloaga. Yakadi meo boote ane dagaxa me libiniena, ogoa migeo nagana boote ane daga libiniena anoibaketema okanicodaagica. Pida iniokini nigini napaloaga ane iwila.

<sup>22</sup>Aneotedogoji jigidaagee. Yemaa me ikee lélagatetema nibeyacaga, codaa yemaa nigina oko moyowoogodi nimawenegegi. Eliodi me dinatite, codaa me ikee me yakadi me ixomagateetedijo loenataka nigijo oko ane yelatetema, joanigidiaa naaga. <sup>23</sup>Codaa Aneotedogoji yemaa me ikee meliodi loniciwaga meote me godewiga codaa godiwenigide digo minataga nigina oko anicota minatawece oiwenigide. Jotigide naga godiwikode, codaa me godeyagadi me godinelecatagee, codaa modogetetibigogoji. <sup>24</sup>Igaataga Aneotedogoji eniditedogowa, aginokina nigina ane judeutedi, pida eledi eniditediogi nigina ane daga judeutedi.

<sup>25</sup>Joanigidaageete Aneotedogoji, nigijo ane iditini Oséias, anee, “Nigidi ane daga yoiigi,



(Romanos 9.21)

icota mejitiogi me, ‘Yoiigi’.  
 Codaa noiigi ane daga jemaa,  
 icota mejitiogi me, ‘Yemaanigipi.’”

<sup>26</sup> Idiaagidi nigica nipodigi negeetedioji Aneotedogoji nigica oko,  
 “Agakaamitiwaji yoiigi”,  
 idiaagitace nigoditiogi,  
 “Lionigipi Aneotedogoji ewikegi.”

<sup>27</sup> Isaías yalagata loiigi Israel, nigijo mee, “Diganee loiigi Israel meliodi, micataga nigina dotiwadi liniogotibece akiidi-eliodi. Aneotedogoji eote lewiga onatecigidi nigidi noiigi. <sup>28</sup> Igaataga aleegi Goniotagodi Aneotedogoji ja iloikatidi inatawece noiigi nigina iigo, leegodi igenaga. Inoatawece niginoa aneete ico micotece.” <sup>29</sup> Anigicatibige Isaías degeetece nigijoa lotaga, nigijoa eletidi lotaga me yalagata analeegicotece, mee, “Goniotagodi Aneotedogoji ane iige inoatawece, daaditigica ane nenyagaditetema anida aneetege licogegi godaamipi, taga godiciagi nigotaga Sodoma ajaa Gomorra ane yaagadi Aneotedogoji.”

**Noiigi Israel agoyiwagadi nibodicetedi anele ane  
 icogotedibigimece miniwataga Aneotedogoji**

<sup>30</sup> Aneotedogoji eniditedioji oko inatawece digawiniteloco ane noiigi. Ja jinataga Aneotedogoji me dibatetege ane daga judeutedi leegodi monakato, ane dogodoletibige me dibatetege Aneotedogoji. <sup>31</sup> Pida noiigi Israel anodoletibige Aneotedogoji me dibatetege leegodi moyotete liigenatakanegeco, pida agoyakadi moyotete niigenatakanegeco. <sup>32-33</sup> Igaamee daga yakadi me dibatetege Aneotedogoji? Ayakadi leegodi odoletibige Aneotedogoji me dibatetege leegodi moyotete niigenatakanegegi, idigida aleegodi dogonakato Aneotedogoji. Odaa micataga daga nixipaga, ixipe wetiga. Aneotedogoji lotaga eetece nagajo wetiga, nigijo mee,  
 “Digawini!

    Jao inikateloco wetiga manitaga nigotaga Sião.  
 Odaa nigina oko odixipetigi nagani wetiga.  
 Nagani wetiga nelegi eo nigina oko menitiniwace.  
 Pida aneyiwagadi baadigica liboliga.”

(Nigijoa liigexegi Aneotedogoji jiginiaagoditalo me wetiga.)

**10** <sup>1</sup> Inioxoadipi. Jemaa manitawece yaalegena, yoiigi Israel mida lewiga. Jipokotalo Aneotedogoji meote lewiga. <sup>2</sup> Igaataga jakadi meji meliodi moyemaa moyocaganegetibigo Aneotedogoji, pida agoyowoogodi nigica anigetaga nimawenegegi. <sup>3</sup> Agoyowoogodi nigica anigote Aneotedogoji nigina oko meote me igenaga. Odoletibige mowo epaa lakatigi, odaa jogodowocetege nigijo anigote Aneotedogoji oko me igenagadi. <sup>4</sup> Igaataga Cristo eotedibige me dagadiaa leeditibige nigina oko me yotete liigenatakanegeco Aneotedogoji oditaga ja igenaga. Pida nigina oko leeditibige midokida me nakato Cristo, odaa Aneotedogoji ja dibatetege.

### Aneotedogoji yakadi meote lewiga okanicodaagica oko

<sup>5</sup>Moisés yalagata anodaa nimawenegegi oko me yakadi me igenaga lodoe Aneotedogoji, nigina meyiwaagadi niigenatakanegeco. Mee me iditini, “Nigina aneote inoatawece ane Aneotedogoji liigenatakanegeco, joaniginiaa yakadi midiooka limedi me yewiga leegodi meyiwaagadi niigenatakanegeco.”

<sup>6</sup>Pida nigina meetece Moisés nigina oko ane igenaga leegodi me nakato Aneotedogoji, mee, “Jinagakamaaga adinige, degeni, ‘Amiijo ica ane yakadi migo digoida ditibigimedi?’” Nigida gagikanegegi ikee memaani manadeegi Cristo micogoteenedibigimece ditibigimedi, menagi eote me godegenaga.

<sup>7</sup>Eleditace mee Moisés, “Otegeaagaga adinige, degeni ‘Amiijo ica ane yakadi migo dinikatinece catinedi iigo?’” Nigida gagikanegegi ikee memaani mawii Cristo me dinawacetedibige liwigotigi émagaga, menagi eote me godegenaga.

<sup>8</sup>Pida mee Moisés, “Niginoa nibodicetedi ane niwakatee Aneotedogoji agica lagaliigi majipaatalo. Akamaagakaami jegenitece niginoa nibodicetedi, codaa etidiwa catiwedi gadaalegena.” Ijaagijoa nigijoa nibodicetedi ane jelogotagatedibece anoditece gotiwaagatakanegegi.

<sup>9</sup>Joanigidaageeta nigida nibodigi: Nigenita eledi oko Jesus me Goniotagodi, codaa nige iwagati Aneotedogoji me yewikatiditace me yeleo, odao Aneotedogoji eote gadewiga.

<sup>10</sup>Igaataga nigina mewii mejiwaagatakanaga manitawece godaalegena, Aneotedogoji eote me godegenaga, codaa nigejinagatece gotiwaagatakanegegi, odao Aneotedogoji jegeote me godewiga.

<sup>11</sup>Igaataga mee Aneotedogoji lotaganagaxi, “Inatawece nigina anonakato Goniotagodi agica liboliga.”

<sup>12</sup>Igaataga lodoe Aneotedogoji inatawece oko diniciamico, ina ane judeutedi, inaagina ane daga judeutedi. Igaataga iniaaginiwa Goniotagodi, Niotagodi inatawece oko. Codaa eliodi me ibinie inatawece anodipokotalo me yaxawa.

<sup>13</sup>Joanigidaageeta Aneotedogoji lotaganagaxi, nigijoo mee, “Inatawece nigina anodipokotibige Aneotedogoji ligiwaagenatakanegegi, Aneotedogoji eote lewiga.”

<sup>14</sup>Pida igame nimawenegegi ina oko modipokotalo Aneotedogoji nige dogoyiwaagaditeda? Codaa igame nimawenegegi moyiwaagadi, nige digica mowajipatalo nibodicetedi anele anoditece Goniotagodi? Codaa igame nimawenegegi me najipaaga, nige digica ane yelogoditiogi niginoa nibodicetedi anele anoditece Goniotagodi?

<sup>15</sup>Codaa igame nimawenegegi ina oko me yelogoditedibece nibodicetedi anele nige daga liigexegiteda Aneotedogoji? Joanigidaa leegodi mee Aneotedogoji lotaganagaxi, “Dagaxa mele nigina meno ane nadeegi nibodicetedi anele anoditece Goniotagodi.”

<sup>16</sup>Pida onatecigidi oko anodibatege nibodicetedi anele anoditece Goniotagodi. Igaataga ijo mee Isaías, “Iniotagodi Aneotedogoji. Agica aneyiwaagadi godatematigo.”

<sup>17</sup>Odao nigina oko yakadi me nakato Goniotagodi nigina me wajipata natematigo. Pida wajipata natematigo nigina mini ane yelogodi nibodicetedi anele ane icogotedibigimece miniwataga Aneotedogoji.

<sup>18</sup>Natigide jigika, meji, “Agodogowajipata natematigo?” Owajipata! Digo aneeta Aneotedogoji lotaganagaxi,

“Inatawece oko digoina iigo jogowajipatalo lotaga,  
codaa latematigo jigicoticogi negepaa nigica liniogo iigo.”

<sup>19</sup>Pida jigikataci, mejitiogi, “Loiigi Israel, domigoyowoogoditece ijo natematigo?” Moisés odoejeji me digitataka nigijo negeetece aneeteta Aneotedogoji,

“Jaote manocetematiwaji nigina oko ane digica me yelogo midi me noiigi.  
Codaa jao me gadelatematiwaji noiigi ane digicata lixakedi.”

<sup>20</sup>Odaa Isaías jagani laalegena magaga eetece ane ligegite Aneotedogoji, mee,  
“Nigina ane dogodoletibigiji,  
etidakadi.

Odaa ja idinikeetiogi nigina ane dogodigikatibigiji.”

<sup>21</sup>Pida Isaías yalagata loiigi Israel, nigijo mee, “Inoatawece nokododi jipokotiogi yoiigi modopitiwa. Pida agetidadiwagadi, otigimadadipi.”

### Aneotedogoji iwikode noiigi Israel

**11** <sup>1</sup>Enice jigika, “Aneotedogoji domige dowocetetege idi epaa loiigi?” Ejitagawa adowocetetege. Igaataga emegeeta ida anejitege loiigi Israel. Ijo anejitege Icogegi Abraão, ida anejitege loiigiwepodi Benjamim. <sup>2</sup>Aneotedogoji aikatedice loiigi ane iomagaditedice nigijo maleedigicatibige daga iliidagadi inoatawece ane jinataga. Owoogotiwaji nigijoa Aneotedogoji lotaga anoditece Elias. Elias laagetedipi loiigi nigijo meetalo Aneotedogoji, <sup>3</sup>“Iniotagodi Aneotedogoji. Onigodi nigijo anoyelogoditedibece gadowooko, codaa oyaagadi nigijoa nameejatedi wetiadi aneite me inigotaga eijedi leegodi libeyacegeco oko. Jegemokaanegeeta me ideyagatice, pida aagagodoletibige metideloadi.” <sup>4</sup>Pida Aneotedogoji naga igidi Elias, meeteta, “Ja jotetetomi seete miili goneleegiwadi ane dogoyamagatedini lokotidi lodoe niwigo Baal, agodogeteta” <sup>5</sup>Odaa nigina natigide idaagee. Yeyagaticoace onatecigidi oko analee nepilidi Aneotedogoji, ane iomagaditedicoace leegodi meliodi meletetema. <sup>6</sup>Aneotedogoji iomagaditedice oko leegodi meliodi meletetema, idigida aleegodi diginoa nigicoa loenataka anele aneo Aneotedogoji me ninitedibece. Igaataga daga iomagaditedice Aneotedogoji nigina oko leegotedi loenataka, odaa agotagalee yakadi me ikee meliodi meletetema oko nigina me iolatedicoace.

<sup>7</sup>Odaa yakadi mejinaga noiigi Israel me digicata moyakadi nigica anodoletibige. Onexaagonatecigidi oko anoyakadi anodoletibige, joanigidiaa Aneotedogoji ane iomagaditedicoace. Inegeledi jogowote me dakake laalegenali. <sup>8</sup>Joanigidaageeta Aneotedogoji lotaga, “Aneotedogoji eotedibige me daga neemiteega micataga daga niotaga, eotedibige me dogonadi, otegexaagaga owajipata ica anewi. Jigidaagee nigidi oko codaa nigina noko.” <sup>9</sup>Davi eledi yalagatiogi, mee,  
“Jemaa moiloikatiditibigiwaji miditaga lalokadi,  
micataga nigini eijeegagi nibakajetegi,

codaa moigoetiniwace,  
odaa ja dinilaatibigiwaji ica modaagigotibeci.

<sup>10</sup> Jemaa me micataga degetoinadi amaleegaga ayatetibigiwaji,  
codaa micataga digidioka limedi moyoyagaditedibece niginoa ane  
dakaketema.”

<sup>11</sup> Enice, jigika, “Inoa judeutedi, domigidioka limedi moyototedice  
Aneotedogoji, micataga nigina oko ane dixipe oditaga jigidiaagite ane lanikadi?”  
Agidioka limedi moyototedice Aneotedogoji. Pida Aneotedogoji eote lewiga  
nigijo ane daga judeutedi leegodi nigijo judeutedi moniteloco nibeyacaga me  
dogoyiwagaditeda Aneotedogoji, eotedibige monocetema nigijoa ane daga  
judeutedi. <sup>12</sup> Aneotedogoji eliodi me ibinie eledi noiigiti nigina iigo leegodi  
libeyacegeco loiigi me dogoyiwagaditeda. Codaa eliodi me ibinie nigijo ane  
daga judeutedi, leegodi nigijo ane judeutedi moniaditema niliicagajetedi anewi.  
Nigina nigodopitalo Aneotedogoji ijotawece nigijoa judeutedi aneniditediogi,  
odaa Aneotedogoji dagaxatace me ibinie nigina eledi oko ane daga judeutedi.

### **Aneotedogoji eote lewiga ane daga judeutedi**

<sup>13</sup> Natigide ejitagawatiwaji ane dagakaami judeutedi. Jowoogodi  
Aneotedogoji me idimonyatediogi ane daga judeutedi. Jowoogodi me gonegegi  
nigida ibakedi ane najigotediwa. <sup>14</sup> Ijoatokaaga jakadi me jao nigijo emaga  
yoiigi monocetagadomitiwaji, amaleegaga icawaanigi Aneotedogoji aneote  
lewiga leegodi nigida ibakedi. <sup>15</sup> Igaataga nigina oko digoina iigo ane daga  
judeutedi odopitalo Aneotedogoji leegodi nigijo ane judeutedi me dowocetetege.  
Nigina nige dibatacetege Aneotedogoji nigijoa judeutedi, odaa eo meliodi  
godinikegi leegodi Aneotedogoji meote me newigatace nigijoa judeutedi.

<sup>16</sup> Nigoyajigotalo Aneotedogoji paon liwai, odaa iditawece paon eledi nebi.  
(Jotigide laamipi judeutedi liciagi nigijo paon liwai. Aneotedogoji dibatetege,  
odaa eledi dibatetege lionigipi). Nigoyajigotalo Aneotedogoji litodi nagana  
niale, libiwedi eletidi nepilidi. <sup>17</sup> Inoatecibece libiwedi nawodigije oliveira  
onakagidi. Odaa libiwe oliveira loidena jogoyexocagaditege nagajo ane  
dinoke libiwe nagajo eledi oliveira. Odaa nagajo gela libiwe ja ili, codaa me  
dione, leegodi litodi. Niginoa judeutedi liciagi nagajo nawodigije oliveira.  
Akamagakaamitiwaji ane dagakaamiteda judeutedi бага gadiciagi nagajo  
libiwe anoka oyexocagaditeloco eledi. Natigide abaategetiwaji loniciwaga  
codaa me lewiga Aneotedogoji ane yajigotediogi loiigi judeutedi. <sup>18</sup> Agele  
digikaniticoace, daaditagadiaagica mawiite ijoa judeutedi ane liciaco  
libiwedi oliveira ane dinoke. Ayakadi dagadinagaxakenitibecetiawaji,  
igaaataga nigida makaami gadiciagi micoataga libiwedi niale. Nagana libiwe  
niale adowediteloco litodi, pida litodi yajigota liweenigi niginoa libiwedi.

<sup>19</sup> Pida ane dagakaami judeutedi menitiwaji, “Onakagidi nigijoa libiwedi  
owotibige moyexocagaditini eledi libiwe. Odaa godiciagi nagajo eledi libiwe.”

<sup>20</sup> Ewi monakagidi nigijoa libiwedi anoiciaceeketege judeutedi. Pida nigijoa



judeutedi Aneotedogoji agaleegeetediogi me loiigi leegodi agonakato, odaa akaamitiwaji etigadawanagatitege loiigi Aneotedogoji leegodi manakatoni. Odaa jinaga domaga adinagaxakenitibecetiwaji, pida adinoweti. <sup>21</sup>Aneotedogoji ja iloikatidi judeutedi, anoiciaceketetege nigijoa niale libiwedi anoyakagidi. Odaa akaamitiwaji nigikani manakatoni, akaami eleditetiwaji gadiloikatiti.

<sup>22</sup>Ja jinataga nigica Aneotedogoji meliodi meletetema oko, codaa igenaga me iloikatidi nigina eledi oko. Iloikatidi nigina anoika monakato, pida eliodi meletedagadomitiwaji nige digikaniteda manakatoni. Nigikanitiwaji manakatoni, odaa agaleegeetedagawatiwaji makaami loiigi, gadiciagi nigijoa libiwedi oliveira ananakagidi. <sup>23</sup>Odaa nigijoa judeutedi, nigodopitalo Aneotedogoji monakatotace, odaa ja yawanagaditacetetege loiigi, igaataga Aneotedogoji yakadi meote modopitalo. <sup>24</sup>Odaa akaamitiwaji ane dagakaami judeutedi, gadiciagi nagajo libiwe oliveira loidena anoyakagidi, odaa jogoyexocagaditeloco nagajo niale nawodigije, nagajo ane daga libiwe. Pida nigijoa judeutedi liciaco nigijoa anepaa libiwedi nagajo niale nawodigije ananakagidi. Adakake dogoyexocagaditacedini libiwedi anoyakagidi nagajo niale oliveira loidena. Odaa jigidaagee agica lagaliigi Aneotedogoji daga yexocagaditacedini nigijoa libiwedi anida aneetege nagajo niale nawodigije, odaa jigidaagee me yawanagaditacetetege judeutedi nigijoi loiigi.

#### Aneotedogoji iwikode inatawece oko

<sup>25</sup>Inioxoadipi. Jemaa mowoogoti ane nelogoditedogowa Aneotedogoji, amanagawini agadinagaxakenitibecetiwaji leegodi Aneotedogoji aneote mowoogoti. Nikeetedogowa midi nigina noiigi judeutedi dakake laalegena nigepaagicota monotalo Aneotedogoji inatawece nigina ane daga judeutedi aneniditediogi. <sup>26</sup>Odaa jigidaagee, Aneotedogoji eote lewiga inatawece loiigi Israel. Aneotedogoji lotaga yalagata nigida niciagi, nigijoi mee,

“Ganewikatitogodi icogoticogi manitaga nigotaga Sião,  
oda enagi napitagadi inoatawece libeyacegeco oko anida aneetege  
licogegi Jacó.

<sup>27</sup>Aneotedogoji mee,

‘Jao micota ane igegitiogi,  
inapitagadi libeyacegeco anida aneetege licogegi Jacó.’”

<sup>28</sup>Judeutedi agodibatege nibodicetedi anele ane icogotedigi miniwataga Aneotedogoji. Joanigidaa leegodi me laxakawepodi Aneotedogoji eotedibige me yakadi me gadibinienitetiwaji ane dagakaami judeutedi. Pida Aneotedogoji ixipetedice noiigi Israel, codaa yemaa leegodi nigijoi ane ligegitetege laamipi. <sup>29</sup>Igaataga nigina Aneotedogoji me iolatedicoace oko, codaa nigina me ibinie, aiigi ane lowooko. <sup>30</sup>Nigijoi jotigide akaamitiwaji ane dagakaami judeutedi agiwagati Aneotedogoji. Pida natigide Aneotedogoji gadiwikodenitetiwaji leegodi nigijoi judeutedi me dogoyiwagaditeda. <sup>31</sup>Joanigidaagee natigide nigijoi judeutedi agoyiwagadi Aneotedogoji leegodi me gadiwikodenitetiwaji. Eotedibige Aneotedogoji magaga yakadi me niwikodetedinuwace. <sup>32</sup>Leegodi

ijotawece oko agoyiwagadi Aneotedogoji, odaa jegeote me digicata ane yakadi me ika nibeyacaga, micataga daga dinigoetiniwace, daga niwilogojegipi. Aneotedogoji eotedibige me niwikodetediwace inatawece oko.

### Leeditibige me jogeegatalo Aneotedogoji

<sup>33</sup>Aneotedogoji yowoogodi inoatawece, codaa yowoogodi oninitecibeci ane loenataka. Agica liciagi. Ajakataga daga jowoogotaga nigicoa ane lowooko, codaa ajakataga daga jowoogotaga inoatawece nigicoa aneote.

<sup>34</sup>Joanigidaageeta Aneotedogoji lotaga, anee,

“Amiijo ane yakadi me yowoogodi icoa lowooko Goniotagodi Aneotedogoji? Codaa amiijo ane yakadi me iladee?”

<sup>35</sup>Codaa amiijo baanaga ica anigini ane yajigotalo Aneotedogoji, odaa ja nibeotege loojedi?”

<sup>36</sup>Igaataga iliidaagadi inoatawece, codaa inoatawece aninoa idioka limedi minoa leegodi nimawenegegi, codaa inoatawece aninoa, iniaa loenataka, codaa modogetetalo leegodi loenataka. Joanigidaa leegodi me leeditibige midioka limedi me jogeegatalo Aneotedogoji. Odaa jigidaagee. (Amém).

### Godewiga me jibaagatema Aneotedogoji

**12** <sup>1</sup>Enice inioxoadipi, jipokotagawatiwaji mewi madinajicitalo Aneotedogoji, leegodi eliodi me godiwikode. Nigijo jotigide oyalegi eijedi moibootalo Aneotedogoji mowotibige me ninitedibece, pida oko бага idiniboonagatalo Aneotedogoji godiciagi nigina niboongi ewikegi. Odaa iniokiniwateda me godewigatema. Joanigidaa ane yemaa Aneotedogoji. Odaa joanigidaa aneo mewi me jogeegatalo. <sup>2</sup>Jinaga domaga iwitece lakataga okotigi nigina iigo anodakapetege Aneotedogoji. Pida ikani Aneotedogoji me iigi gadaalegenali, amaleegaga owoogotitiwaji ane yemaa Aneotedogoji. Ane yemaa Aneotedogoji eletagadomi, agicaadaga beyagitagadomi, codaa me ninikatidi Aneotedogoji, codaa me igenagatagadomi.

<sup>3</sup>Aneotedogoji najigotediwa ibakedi, codaa aagaga najigotediwa yoniciwaga me jao nigida ibakedi. Joanigidaa leegodi mejitagawatiwaji, jinagaleetibige dagakaami gonegegipi, igaataga agakaami gonegegipitetiwaji. Pida nigakamaga adinowootiwaji, owoo nigica anele, ane igenaga, codaa jinogowootiwaji dogoleetibige me gadeloki. Akamagakaami leeditibige madiniwini amaleegaga anati naga yajigotedagawa Aneotedogoji gatiwagatakanegegi. <sup>4</sup>Digowoo nigina godolaadi owidi liwailidi, pida idiokidi godolaadi aneitelo. Codaa oniditeci liwai ida ane libakedi. <sup>5</sup>Nigida moko, oko eliodi, godiciagi liwailidi godolaadi. Pida okomogokotiwage godiciagi godolaadi mokiditece. Codaa nigida moko okotawece godexogotege Cristo. Odaa okotawece ida anejinagatiwage digo minoataga liwailidi godolaadi. <sup>6</sup>Joanigidaa me daga diniciamico godixaketedi ane najigotedogowa Aneotedogoji me jibakenaga. Nigida godixakedi mejinagatiogi nigina anonakato Goniotagodi nigica ane yemaa Aneotedogoji me ligegitediogi,

jaoga nigida gobakedi me jinakatonaga Aneotedogoji. <sup>7</sup>Nige najigotedogowa Aneotedogoji godixakedi me jaxawanaga eledi oko, dice jaxawanaga. Nige najigotedogowa godixakedi me jiigaxinaganagatece lotaga Aneotedogoji, dice jiigaxinaganaga. <sup>8</sup>Nige najigotedogowa Aneotedogoji godixakedi me jaoga loniciwaga eledi oko modiocece Cristo, dice jaogo loniciwaga. Nige najigotedogowa gonimawenegegi me jedianagatece oko anigidi ane yopotibige, dice jedianaga, mele godaalegena. Nige najigotedogowa godixakedi me jiigenatakanaga, dice jibakenaga minitawece godoniciwaga me jiigenatakanaga. Nige najigotedogowa godixakedi me jiwikodenaga eledi oko, dice godinitibece me jiwikodenaga.

<sup>9</sup>Emaani eledi oko manitawece gadaalegena. Codaa oxaxini ane beyagi, pida oleetibige me iwitece anele. <sup>10</sup>Oleetibige meliodi memaani nigina anonakato Goniotagodi micataga daga gadoliigiwepodi. Oleetibige mawenigideni eledi oko. <sup>11</sup>Jinagakaami abacigegitema gabakedi. Awii libakedi Goniotagodi manitawece codaa mele gadaalegena. <sup>12</sup>Aniitiitbeci leegodi manibeoonitibigege lanokegi Goniotagodi. Adinatiitalo gadawikodico, codaa jinigikani motaganegeni Aneotedogoji. <sup>13</sup>Edianitecetiwaji ganioxoadipi ganigidi lagalanigi ane yopotibige. Codaa abaatege oko ane yopotibige limedi.

<sup>14</sup>Ipokitalo Aneotedogoji me ibinie nigina ane igaalatibigagaji. Ipokitalo me ibinie, pida jinigipokitalo degeote ane beyagitema. <sup>15</sup>Oleetibige me gadinikagawa ane ninitibece. Codaa anoeni nigini ane anoe. <sup>16</sup>Aniwotitema eledi oko. Jinagakaami anagaxakenegegi, pida oleetibige me gadokaagedi ane daga gonegegi. Jinagaleetibige daga dagaxa mida gadixakedi caticedi nigina eledi oko.

<sup>17</sup>Nigica aneo ane beyagitagadomi, jinagawii ane beyagitema. Oleetibige mawii anoyakadi eledi oko mele. <sup>18</sup>Nigakatitiwaji, awii me gadilakiitege inatawece oko. <sup>19</sup>Inioxoadipi yemaanigipi. Jinogleetibige daga oojete. Pida ikanitece Aneotedogoji mepaa yelatetema, oada eote lawikodico nigini oko aneo ane beyagitagadomitiwaji. Igaataga maditaga lotaganagaxi Aneotedogoji mee Goniotagodi Aneotedogoji, “Emokee mida yoniciwaga me joojete. Oada jao lawikodico nigina oko anowo ane beyagitagadomitiwaji.”

<sup>20</sup>Dice awii aneeta lotaganagaxi Aneotedogoji, nigijo negee, “Nige nigicile gadaxakawa, edianitece niweenigi, nige yeloadi ecibi, acipegeni. Igaanigawii nigida aneni, oada eliodi me niboliga gadaxakawa.” <sup>21</sup>Jinigikani ane beyagi daga dinigaanyetagadici. Pida agekeni ane beyagi mawii anele.

### Leeditibige mejiwagataga anida nagatetigi

**13** <sup>1</sup>Leeditibige mokotawece ejiwagataga inatawece anida nagatetigi. Igaataga agica ini ane diigenataka ane daga Aneotedogoji yajigote nagatetigi, pida Aneotedogoji inaageyate niginoa anida nagatetigi digoina iigo. <sup>2</sup>Joanigidaa leegodi nigina oko ane lakapetegi nigina anida nagatetigi digoina iigo, aagaga lakapetegi Aneotedogoji liigenatanegegi. Oada nigina lakapetegi nigina ane niigenatakanaga nigidiaagidi nawikodeega, iloikatidi Aneotedogoji. <sup>3</sup>Igaataga nigina anowo anele agodoita nigina anida nagatetigi.

Pida inokina nigina anowo ane beyagi, bogodoita nigina anida nagatetigi. Akaami nige degemaani madoii anida nagatetigi, dice oleetibige mawii anele, odaa ele moyalagatibigagaji. <sup>4</sup>Igaataga nigina ane diigenataka digoina iigo eo libakedi Aneotedogoji, nibakedi aneletagadomi. Pida nigawii ane beyagi, enice ele madoii. Igaataga nigina ane diigenataka ewi mida loniciwaga me diigenatakatagawa metigadiloikatiti. Leegodi eo Aneotedogoji libakedi, odaa iloikatidi nigina oko aneo ane beyagi, igaataga Aneotedogoji ja yelatetema libeyacegeco nigina oko. <sup>5</sup>Joanigidaa leegodi me leeditibige me iwagati niginoa anida nagatetigi, aleegodi madoiita mawikodee, pida leegodi me eemiteetece catiwedi gadaalegena nigina mawii ane beyagi, ogoa, domige ina anele.

<sup>6</sup>Codaa joanigidaa leegodi leeditibige medianitiwaji inionigi-eliodi mepaagodibatege ganinyeelo niginoa anida nagatetigi, igaataga owo libakedi Aneotedogoji ane yajigotediogi. <sup>7</sup>Enice ediani ane ganaalewetema inionigi-eliodi, codaa me okanicodaagicoa eletidi ganaalewe. Eemiteetibige codaa mawenigidenitiwaji inatawece anida nagatetigi.

#### Ica ane leeditibige minigata eledi oko

<sup>8</sup>Jinigikani digidioka limedi midiwa ganaalewe. Pida leeditibige midioka limedi memaani eledi oko. Igaataga nigina ane yemaa eledi oko, jegeote icoatawece nigicoa liigenatakanegeco Aneotedogoji anetigodiigeta me jaoga. <sup>9</sup>Mee Aneotedogoji, “Emaani eledi oko digo aneni madinemaani.” Nigina oko nigeo nigida niigenatakanegegi, odaa jegeote nigijoa eletidi liigenatakanegeco Aneotedogoji ane iditedini Moisés, “Jinaga gadoomatewa ane daga gadodawa. Jinaga domaga aijee. Jinogolice. Jinaga aniliitibige eledi oko. Jinegemaani nigina ane daga ganebi.” Odaa nigidiwa niigenatakanegeco codaa okanicodaagica eledi liigenatakanegegi Aneotedogoji liciagi nigijo niigenatakanegegi anee, “Lajo memaani eledi oko digo aneni madinemaani.” <sup>10</sup>Nigina ane yemaa eledi oko inokeo aneletema. Odaa joanigidaa nigina ane yemaa eledi oko jegeote icoatawece nigicoa liigenatakanegeco Aneotedogoji.

<sup>11</sup>Nigica noko lanokegi Cristo me dopitedijo me godewikatidi jегeпаanaga nipegi, agalee liciagi nigijo noko maleekoka jinakatonaga Goniotagodi. Enice, jogowoogotitiwaji me leeditibige madinoweti, codaa madinemaanitiwage. <sup>12</sup>Liciagi nigina enoale naga ixomagatice, odaa ja yelogotibige, Codaa leeditibige me jikanaga niginoa ane beyagi aneo nigina oko anida aneetege nexocaga. Leeditibige me godigotema me jaogate nibaketedi anele manitaga lokokena. <sup>13</sup>Jaoga nigina ane igenaga liciagi nigidi oko ane newiga manitaga lokokena. Jinaga domaga jacapenaganagatibece migetaga jacipagatibece; codaa jinaga domaga jitinegenaga nigina ane daga gododawadipi; codaa jinaga jidelaga otegeaagaga jelokojogonaga. <sup>14</sup>Bigida leeditibige me gadigomi mawii inokina anele, igaataga Goniotagodi Jesus Cristo yajigotedagawa loniciwaga mawii anele. Jinaga domogowoo mawii ane beyagi, anokomaga jilidagatagatibige me jaoga.

### Jinaga alomegeni ganioxoa

**14** <sup>1</sup>Abaatege gadiwigotigitiwaji nigina ane degeliodi eliwaḡatakanegegi. Pida jinagabaatege daḡadinotigimadenitege leegodi nigicoa anaḡaga lowooko. <sup>2</sup>Inatecibece oko oyiwaḡadi moyakadi moyeligo okanicodaagica niweenigi. Pida inatecibece eledi oko ane degeliodi eliwaḡatakanaga, oyeligo inokinoa niginoa ane ḡotanigijedi. <sup>3</sup>Nigina ane yeligo okanicodaagica niweenigi, leeditibige me daga igoadita nigina aninoka yeligo ane ḡotanigijedi. Odaa nigina ane daga yeligo libole, leeditibige me deḡee me libatiigi nigina eledi me yeligo okanicodaagica niweenigi. Iḡaataga Aneotedoḡoji ja dibatetege nigini oko. <sup>4</sup>Nigida makaami aḡica ḡanaḡatetigi malomegeni liotagi eledi oko. Nigina niotagi, nigeo nibakedi anele, oḡoa, domigeo nibakedi ane beyagi, niotagoḡi jiginiaa iwi libakedi. Odaa nigina Aneotedoḡoji liotagi eo nigina anele, iḡaataga Aneotedoḡoji yajigote nimaweneḡegi meo nibakedi anele.

<sup>5</sup>Inatecibece odiletibige diḡida noko ane enegegi ida ane jaḡa, aliciagi niginoa eletidi nokododi. Pida inatecibece oko jagagoḡdiletibige diḡinoatawece nokododi diniciamico. Oninitecibeci leeditibige mewi me dowooko amaleeḡaga yowoḡodi nigica aneletema. <sup>6</sup>Nigina ane diletibige diḡida noko me daḡaxa mida ane jaḡa, yotete nigida noko me doḡetetalo Goniotagoḡi. Codaa nigina ane yeligo okanicodaagica niweenigi, nigina naḡa yeligo, doḡetetalo Goniotagoḡi, codaa diniotagoḡdetalo Aneotedoḡoji leegodi midi ane yeligo. Odaa nigina ane inoka yeligo ane ḡotanigijedi, aḡaga doḡetetalo Goniotagoḡi leegodi me diniotagoḡdetalo Aneotedoḡoji midi ane yeligo. <sup>7</sup>Aḡica ini anini ḡodiwigotigi ane yakadi mee, “Abeyagitema eledi oko me idewiḡa, oḡoa mige ideleo.” <sup>8</sup>Nige ḡodewiḡa, ḡodewiḡatema Goniotagoḡi. Nige ḡodeleo, ḡodeleotema Goniotagoḡi. Enice nige ḡodewiḡa, oḡoa, domige ḡodeleo, idioka limedi moko nebi Goniotagoḡi. <sup>9</sup>Iḡaataga Cristo yeleo, pida yewiḡatace eotedibige me Niotagoḡi émaḡaga codaa moko anepaḡalee ḡodewiḡa.

<sup>10</sup>Enice iḡaamee ina meni ganioxoa me dibatá? Codaa iḡame leegodi me daḡadiaaḡica mawii ganioxoa? Iḡaataga icota noko mokotawece idinikeenaga lodoe Cristo. Odaa Cristo ja najigotedoḡowa nigica ane iḡenaga me jibaḡatege me ḡonogeedi leegodi niginoa ḡodoenatakatema.

<sup>11</sup>Iḡaataga diniditeloḡo lotaḡanaḡaxi Aneotedoḡoji,

“Mee Goniotagoḡi,

‘Idewiḡa, odaa jinagawienatakani minatawece oko oyamaḡatedi lokotidi yodoe,

codaa inatawece oko moditiwa me Ee Aneotedoḡoji.”

<sup>12</sup>Odaa joanigidaagee, okotawece jelogoḡataḡalo Aneotedoḡoji icoatawece nigicoa ane ḡodoenataka.

### Jinagawii ganioxoa meyamagatice eliwagatakanegegi

<sup>13</sup>Enice jikanaga me idinalomegenaga. Leeditibige mowoo me dagadiaagawii ganioxoa meyamagatice eliwagatakanegegi, migetaga ika me diotece Goniotagodi. <sup>14</sup>Leegodi me ee nebi Cristo, odaa jowoogodi codaa ajawienataka me digica niweenigi ane daga yakadi me jelicaga daga leegodi moibootiogi niwicidi. Pida nigica ane diletibige digica niweenigi ane daga yakadi me jelicaga leegodi moibootiogi niwicidi, nige yeligo nigica niweenigi, odaa ja dibatá. <sup>15</sup>Nigawii ganioxoa magecagalo leegodi niweenigi anelici, jigikeeni me degemaani ganioxoa. Pida Cristo ja yeletetema nigini ganioxoa. Enice jinagawii me ika metiwagataka leegodi niweenigi anelici. <sup>16</sup>Jinaga domagawii eledi oko modotagatibige nigica anakati mele. <sup>17</sup>Igaataga Aneotedogoji iige catiwedi godaalegenali. Joanigidaa leegodi aleeditibige daga godigecagalege nigica ane jelicaga, migetaga ane jacipaga. Pida leeditibige minoka jaoga nigina ane igenaga, codaa joleegatibige minatawece oko ilagatiwage, codaa midokida godowoogo inaa godinikegi. Jakataga me jaogate inoatawece leegodi loniciwaga Aneotedogoji Liwigo. <sup>18</sup>Nige nigidaagee nigina liotagi Cristo, odaa yocaganege Aneotedogoji, codaa eo me ninitedibece. Odaa nigina oko odeemitetibige nigina liotagi Cristo.

<sup>19</sup>Enice joleegatibige nigica aneo me godilagatiwage, codaa joleegatibige me jaoga nigina ane yaxawa eledi oko me ilitema eliwagatakanegegi. <sup>20</sup>Jinaga domaga aagati nigica Aneotedogoji aneotetema ganioxoa leegodi niweenigi anelici. Yakadi melici okanicodaagica niweenigi, pida jinaga domegelici nigica niweenigi aneo eledi oko me eyamagatice eliwagatakanegegi. <sup>21</sup>Ele nige degelici libole, nige daga acipe viinyo, otegexaagaga awii anigetigini aneo ganioxoa me dibatá, oditaga eyamagatice eliwagatakanegegi.

<sup>22</sup>Nigica ananatitece meo nigida niciagi, oteteni makamokakaami mowoogoti iniaa Aneotedogoji. Nigina oko ninitibece, nigina me daga deemitece catiwedi laalegena me dibatá leegodi nigina loenatagi aneo. <sup>23</sup>Pida nigina ane dinawietibece, ane diletibige daga dibatá nigina me yeligo libole, Aneotedogoji iloikatidi nigina oko leegodi ageo nigica ane deemitece laalegena. Igaataga nigina oko ane diletibige me daga ilagatice meo anigidi, pida eo, odaa ja dibatá (igaataga adioteci ane yowoogodi me igenaga).

### Leeditibige me jocaganegenagatibigo eledi oko

**15** <sup>1</sup>Nigida moko baanaga yoniciwadi gotiwagatakanegegi leeditibige me idinatiigatalo niginoa loenataka nigina analee degeliodi eliwagatakanegegi, codaa idinatiigatalo niginoa lowooko, icaagica nige daga domaga godiwoditema lowooko. Agele daga jaoga inokina anokomoka aneletogodomi. <sup>2</sup>Pida oninitecibeci leeditibige me yocaganegetibigo nioxoa, meo nigica aneletema, eotibige me yaxawa me ili eliwagatakanegegi. <sup>3</sup>Igaataga Cristo jigidaagee ageote ini

anepaga yemaa. Dinatite nigijoa lawikodico, digo aneeta me diniditeloço lotaganagaxi Aneotedogoji. Nigica Cristo naga yotaganenege Eliodi, meeteta,  
 “Nigijo anoyametibigagaji,  
 aagaga etidame.”

<sup>4</sup>Igaataga ijoatawece ane diniditeloço Aneotedogoji lotaganagaxi, nigica jotigide, ijoatawece diniditidini metigodiigaxi me idinatiigatalo godawikodico, codaa mowo mabo godaalegena. Joanigidaa leegodi me inibeonagatibigege lanokegi Cristo.

<sup>5</sup>Aneotedogoji najigotedogowa godoniciwaga me jakataga me idinatiigatalo godawikodico, codaa meote mabo godaalegena. Odaa jipokotalo Aneotedogoji me gadaxawanitewaji midokida ane gadowoogo, codaa midioka limedi me gadiilakiitiwagetiawaji, digo anee Jesus Cristo me nikeetedogowa. <sup>6</sup>Jigidaa ane jipokotalo amaleegaga akaamitawece atecigi, micataga dogokinitece oko, odaa akaamitawecetiawaji ogeetetalo Aneotedogoji, ane Eliodi Goniotagodi Jesus Cristo.

### **Niginoa nibodicetedi anele aagagicotiogi ane daga judeutedi**

<sup>7</sup>Dicabaategetiwaji eledi oko, digo anigotedogowa Cristo me dibatedogogi, amaleegaga odogetetibigimece Aneotedogoji nigina oko. <sup>8</sup>Ejitagawatiwaji joanigidaa leegodi Cristo me dinajigo me liotagi judeutedi, eotedibige me ikee Aneotedogoji me daga ixomagateetedice ane ligegi, pida eote ane ligegitediogi nigijo jotigide laamipi judeutedi. <sup>9</sup>Codaa dinajigo me liotagi judeutedi eotedibige nigina ane daga judeutedi modogetetalo Aneotedogoji, leegodi me iwikodediogi. Davi yalagata nigidi noiigi maditaga Aneotedogoji lotaganagaxi, nigijo mee,

“Joanigidaa leegodi jogetetagawa liwigotigi nigidi ane daga judeutedi,  
 codaa jigaa enaco me jogeteta Gaboonagadi.”

<sup>10</sup>Eledi mee Aneotedogoji lotaga,

“Akaamitiwaji ane dagakaami judeutedi,  
 aniniitibecitiwaji,  
 awanitege nigijo noiigi Aneotedogoji ane iomagaditedice!”

<sup>11</sup>Codaa eleditace mee,

“Akaamitawecetiawaji ane dagakaami judeutedi ogeetetalo Goniotagodi!  
 Igaataga inatawece ane noiigi leeditibige modogetetalo.”

<sup>12</sup>Codaa me Isaías iditeloço Aneotedogoji lotaganagaxi, nigijo mee,

“Nigica anida aneetege licogegi Jessé enagi me iige nigina ane daga  
 judeutedi.

Odaa onibeotege me yewikatiditibigiwaji.”

(Nigica Jessé, Davi eliodi).

<sup>13</sup>Aneotedogoji jiginiaageote me inibeonagatege lanokegi Goniotagodi Jesus. Odaa jipokotalo meliodi me yajigotedagawa gadinikegitiwaji, codaa meote mele gadaalegenali malee iwagatitewaji, amaleegaga yajigotagawatiwaji Aneotedogoji Liwigo ganimawenegegi mepaanaga anibeonitege lanokegi Goniotagodi Jesus.

**Paulo libakedi me yelogditedibece nibodicetedi  
anele miditaga ane daga judeutedi**

<sup>14</sup>Inioxoadipi, emegeeta eliodi me jowoogodi, codaa ajawienataka meliodi makaamitiwaji eletetemaeledi oko, codaa jowoogodi mowoogoti anodaa diitigi gotiwagatakanegegi, codaa mowoogoti madinoxoki madinajacagatitiwaji. <sup>15</sup>Pida, inioxoadipi, jiditini ane igegi amaleegaga jao manalakitibige niginoa anejitece. Aidoi me jidi nagadi notaganagaxi, igaataga Aneotedogoji idiomagaditedice me jao ane libakedi. <sup>16</sup>Idiomagaditedice me ee liotagi Jesus Cristo, codaa magaga jiba miditaga ane daga judeutedi. Nigina mejitece nibodicetedi anele anoditece Jesus, jiba micataga nigina sacerdoti ane yajigo niboonigitalo Aneotedogoji. Jaotibige nigina ane daga judeutedi meniwigatakanaga, oada ja liciagi nigina niboonigitalo Aneotedogoji ane dibatetege, jigidiaagidi ane ixipeticoace Aneotedogoji Liwigo mepoka nepiliditeda.

<sup>17</sup>Enice jakadi me idinabaketibece leegodi ibakeditema Aneotedogoji, leegodi me idexogotege Cristo. <sup>18</sup>Igaataga inoka jemaa mejitece niginoa Cristo ane loenataka me idibake. Najigotediwa yoniciwaga me jao nigida nibakedi, codaa me jao nigijo ane daga judeutedi monakato Goniotagodi. Nigidi oko oyiwigadi Aneotedogoji nigijo nogowajipatalo yotaga, codaa nogonadi anodaagee yewiga. <sup>19</sup>Eleditace oyiwigadi nigijo nogonadi niginoa ane gobinico anoikee loniciwaga Aneotedogoji, codaa me niginoa godoxicegetedi. Odaa jogoyiwagadi Aneotedogoji leegodi loniciwaga Liwigo Aneotedogoji. Joanigidaa ibakedi nigijo naga idixomagateloco nigotaga Jerusalém, codaa me niginoa nigotadi anodipegitege, codaa minoatawece nigotadi negepaa nipodigi Ilíria. Inoatawece nigotadi anejigotece ejitece nibodicetedi anele anoditece Cristo. <sup>20</sup>Idioka limedi me idinoniciwagadi mejitece nibodicetedi anele anoyalagatalo Cristo midiwataga nigotadi analee digica mowajipata moyalagatalo Cristo. Igaataga adomaga jemaa me ibakadi baanigijo me libakadieledi oko, micataga nigina oko ane daga yemaa me dabitegetini ligeladi ditibigimedi lipodagaladi baanigijo me ligeladieledi oko. <sup>21</sup>Idalagatalo Goniotagodi digo aneeta lotaga Aneotedogoji, nigina mee,  
 “Nigijo ane digica mowajipata moditece anodaageeteda Goniotagodi,  
 nigidi oko onadi,  
 codaa moyowoogodi nigica anodaageeteda.”

**Paulo akaa lowoogo migo dalita nigotaga Roma**

<sup>22</sup>Elioditibece me domaga jemaa me idalitagawatiwaji, pida anaga jakadi leegodi ibakedi me jelogoditibece nibodicetedi anele anoditece Cristo miditaga nigidi noiigi ane digica mowajipatalo. <sup>23</sup>Pida natigide ja jigodi nigida ibakedi minoataga niginoa nipodaga. Codaa ja jotigide me domaga jemaa me idalitagawatiwaji. <sup>24</sup>Odaa nige iniwiajeticogi digoida niigo Espanha, oada jemaa



me idalitagawatiwaji. Odaa ejime epenaitedi midiaagejo makaamitagatiwaji, makaami inikagawepoditetiwaji, odaa nigidiaagidi jemaa madaxawanitiwaji me iniwiajeticogi nigepaa Espanha. <sup>25</sup>Pida nigina natigide ejigo nigotaga Jerusalém amaleegaga jaxawa noiigi anida aneetege Cristo manitaga nagani nigotaga. <sup>26</sup>Igaataga loiigi Cristo digoida niigotedi Macedônia aniaa Grécia oyakadi mele monioda dinyeelo moiwakateetigi nigijjo madewetedi loiigi Cristo manitaga nigotaga Jerusalém. <sup>27</sup>Idiaa lowoogo monioda dinyeelo, codaa diitigi amina naalewe moyaxawa noiigi judeutedi. Nigidi ane daga judeutedi anonakato Goniotagodi leeditibige moyaxawa judeutedi madewetedi anonakato Goniotagodi. Igaataga oyelogoditiogi nigijjo ane daga judeutedi anodaageeteda libinico Aneotedogoji ane yajigotediogi. <sup>28</sup>Nigidiaagidi nige jigodi nigida ibakedi me jajigotiogi inoatawece dinyeelo nigidi madewetedi. Igaanige idigo, odaa ja iniwiajeticogi Espanha, odaa inaagejigotece makaamitaga, idalitagawatiwaji. <sup>29</sup>Jowoogodi nigejotagawatiwaji me idalitagawa, eliodi me ninitibece yaalegena, igaataga Cristo owidi laxawanagatakanegigitedomi. Codaa nigejotagawatiwaji jemaa mejitece nigida anigotediwa.

<sup>30</sup>Inioxoadipi, jao ipoketegi leegodi Goniotagodi Jesus Cristo, codaa leegodi Liwigo Aneotedogoji meote me idinemaanagatiwage. Jipokotagawatiwaji ina бага otaganegeni Aneotedogoji, digo aneji me jotaganege amaleegaga idaxawa Aneotedogoji. <sup>31</sup>Otaganegeni Aneotedogoji, ipokitalo me idotetetema nigeladimigipitigi Judéia ane dogoyiwagaditeda Goniotagodi, codaa ipokitalo Aneotedogoji meote nigidi loiigi digoida nigotaga Jerusalém modibatege nigida ibakedi. <sup>32</sup>Odaa joanigidaagee, nige yemaa Aneotedogoji, ejotagawatiwaji me ninitibece yaalegena, odaa joniciwagataga oniniticibeci gonioxoa. <sup>33</sup>Aneotedogoji eote mele godaalegenali. Jipokotalo midioka limedi miniwa makaamitagatiwaji. Odaa jigidaagee. (Amém.)

### Paulo yecoaditibige lokaagetedi manitaga nigotaga Roma

**16** <sup>1</sup>Jemaa me jelegetagawatiwaji goniwaalo Febe, ane libakadi miditaga lapo anonakato Goniotagodi manitaga nigotaga Cencreía. <sup>2</sup>Jemaa mabaategetiwaji goniwaalo leegodi mida aneetege Goniotagodi anodaa leeditibige modigo nigina liomagatagipi Aneotedogoji modibatege gonioxoadipi. Axawanitece okanicodaagica ane yopotibige, igaataga jigijjo me yaxawa eliodi oko, codaa ee ijo magaga idaxawa.

<sup>3</sup>Jemaa me idecoaditibige Priscila ijaa Áquila, yokaagetedi me jibaagatema Jesus Cristo. <sup>4</sup>Priscila ijaa Áquila ja nigomaga moyeleotomi. Joanigidaa leegodi meliodi me iniotagodetiogi. Pida agemokee, pida ijoatawece nigijjo lapoli anonakato Goniotagodi ane daga judeutedi,eledi odiniotagodetiogi Priscila ijaa Áquila. <sup>5</sup>Codaa aagaga idecoaditibige nigijjo lapo anonakato Goniotagodi ane latecagadi ligeladi Priscila ijaa Áquila.

Idecoaditibige Epêneto aneliodi me jemaatibigo. Jigijaagijjo odoejegi oko aneyiwagadi Cristo nipodigi Ásia. <sup>6</sup>Idecoaditibige Maria aneliodi me

dibatogodomi. <sup>7</sup>Idecoaditibige Andrônico aniaa Júnias anida aneetege yoiigi. Anijo me iniwilagawepodi. Niginoa eletidi liigexedi Aneotedogoji eliodi modeemitetibige, akaagoyiwagadi Cristo anigicatibige daga ejiwagadi.

<sup>8</sup>Idecoaditibige Ampliáto, yokaagedi ane jemaa leegodi mida anejinagatege Goniotagodi. <sup>9</sup>Idecoaditibige Urbano eledi godokaagedi me jibaagatema Cristo, codaa aagaga idecoaditibige Estáquis eledi yemaanigi. <sup>10</sup>Idecoaditibige Apeles baanaga ikee meliodi meyiwigadi Cristo. Idecoaditibige ane ligeladi minitaga Aristóbulo. <sup>11</sup>Idecoaditibige Herodião ane yoiigi, codaa nigijo anoyiwagadi Goniotagodi ane ligeladi minitaga Narciso.

<sup>12</sup>Idecoaditibige Trifena aniaa Trifosa, nigijo iwaalepodi anowo Goniotagodi libakedi. Codaa aagaga idecoaditibige nagajo eledi godokaagete godemaana Pérside aneliodi me dibatema Goniotagodi.

<sup>13</sup>Idecoaditibige Rufo liomagatagi Aneotedogoji, codaa aagaga idecoaditibige nagajo eliodo ane idigotiwa micataga daga ee lionigi.

<sup>14</sup>Idecoaditibige Asíncrito, Flegonte, Hermes, Pátrobas, ijaa Hermas, codaa me iditawece gonioxoadipi anidiaagi miditaga. <sup>15</sup>Idecoaditibige Filólogo, Júlia, Nereu ajaa niwaalo, codaa Olimpás ijaa ijotawece ane liomagatagipi Aneotedogoji ane iditibige miditaga.

<sup>16</sup>Adinecoatitiwaji amaleegaga ikeeni madinemaanitiwage, awiitibige me ninitedibece Aneotedogoji. Nigina eletidi lapoli anoyiwagadi Cristo oyecoaditibigajitiwaji.

**Paulo iladee nigijo lapo anonakato Goniotagodi manitaga nigotaga Roma**

<sup>17</sup>Inioxoadipi. Jipokotagawatiwaji manidakitigi nigina anodoletibige mowo mawalacéticoace, codaa madinotigimadenitiwage. Nigidi noiigi oibeyacagadi eledi oko eliwagatakanegegi, codaa modakapetege niigaxinaganegeco gotiwagatakanegegi, baanaga owoogotititiwaji. Awalacetege nigidi noiigi, jinagaleegawanitege. <sup>18</sup>Igaataga nigina anowo eledi oko maniaditema eliwagatakanegegi aliotagipi Cristo, ane Goniotagodi. Pida odioteci nigicoa anepaa lidagataka lolaadi. Ele me notaganaga codaa oiletibigo oko, owotibige moyakadi moinaale nigina ane digica lixakedi. <sup>19</sup>Pida inatawece oko oyowoogodi me iwitecetiawaji Goniotagodi, oada joanigidaa leegodi makaami inikagawepodi. Jemaatiwaji mida gadixakedi mawii anele, idigida ajemaa dogowoogotitiwaji mawii ane beyagi. <sup>20</sup>Aneotedogoji joaniginiaageote mele godaalegena. Aleegi, oada eote manigaanyetece godaxakawa Satanás. Jemaa Goniotagodi Jesus Cristo midioka limedi meletedagadomitiwaji. Oada jigidaagee. (Amém).

<sup>21</sup>Timóteo ane ibakawa yecoaditibigajitiwaji. Lúcio, Jasão, iniaa Sosípatro anida aneetege yoiigi, aagaga oyecoaditibigajitiwaji. <sup>22</sup>Eemoda Tertius ane jidi niginoa Paulo lotaga, aagaga idecoaditibigajitiwaji, leegodi okotawece oko nepilidi Goniotagodi. <sup>23</sup>Ee Paulo yotokagadi ligeladi

Gaio, o daa ele me dibatigi. Codaa nigina loiigi Aneotedogoji digoina idioka limedi me latecagadi ligeladi Gaio. Gaio aagaga yecoatibigagajitiwaji. Erasto, nigina ane doweditelogo ninyeelo nigotaga, iniaa gonioxoa Quarto eledi oyecoatibigagajitiwaji. <sup>24</sup>Jemaa Goniotagodi Jesus Cristo midioka limedi meletedagadomitiwaji. Odaa jigidaagee. (Amém).

### Paulo dogetetibigimece Aneotedogoji

<sup>25</sup>Jogeegatalo Aneotedogoji. Yakadi mepaanaga yoniciwagadi gatiwagatakanegegi. Jigidaageeta niginoa nibodicetedi anele anejitece, nigina me jiigaxinagatece Jesus Cristo. Niginoa ane jiigaxinaganagatece akaaginoa nigica maleekoka dinoe nigina iigo. Pida jotigide agica ane yowoogodi. Natigide Aneotedogoji ja nikeetedogowa. <sup>26</sup>Nigijo ane daga jowoogotaga ane diitigi midiwataga lotaga Aneotedogoji, anoyalaga nigijo anoyelogoditedibece Aneotedogoji lowooko, nigijo ane daga jowoogotaga, Aneotedogoji ja ikee. Aneotedogoji anidioka limedi me yewiga, niwakatee nigidi oko moyelogoditedibece lotaga. Eote minatawece ane noiigi owajipatalo lotaga, eotedibige minatawece oyiwagadi liigenatakanegegi, codaa monakato Goniotagodi.

<sup>27</sup>Iniokiniwateda me Gonoenogodi, codaa iniokiniwateda minoa lixaketedi. Odaa leeditibige midioka limedi me jogeegatalo leegodi Goniotagodi Jesus Cristo. Odaa jigidaagee. (Amém).